

太史范文集目錄

第一卷

詩

第二卷

詩



第三卷

詩

第四卷

表狀劄子

第五卷



表狀劄子

第六卷

表狀劄子 笏記附

第七卷

表

第八卷

表狀

第九卷

表

第十卷

表狀 牋功德疏 右語附

第十一卷

表

第十二卷

表 笏記附

第十三卷

奏議

第十四卷

奏議

第十五卷

奏議

第十六卷

奏議

第十七卷

奏議

第十八卷

奏議

第十九卷

奏議

第二十卷

奏議

奏議

第二十一卷

奏議

第二十二卷

奏議

第二十三卷

奏議

第二十四卷

奏議

第二十五卷

奏議

第二十六卷

奏議

第二十七卷

進故事

第二十八卷

翰林詞草

第二十九卷

翰林詞草

第三十卷

翰林詞草

第三十一卷

翰林詞草

第三十二卷

翰林詞草

第三十三卷

翰林詞草

樂語附

第三十四卷

啓狀

第三十五卷

賦論 策問

第三十六卷

記序銘書傳

第三十七卷

青詞 祭告文 哀詞 誄文

第三十八卷

墓誌銘

第三十九卷

墓誌銘

第四十卷

墓誌銘

第四十一卷

墓誌神道碑銘

第四十二卷

墓誌銘

第四十三卷

墓誌銘

第四十四卷

墓誌銘

第四十五卷

皇族墓誌銘

第四十六卷

皇族墓誌銘

第四十七卷

皇族墓誌銘

第四十八卷

皇族墓誌銘

第四十九卷

皇族墓誌銘

第五十卷

皇族墓誌銘

第五十一卷

皇族墓誌銘

第五十二卷

皇族墓誌銘

第五十三卷

皇族追封記

石記

第五十四卷

皇族石記

第五十五卷

手記

太史范公文集目錄

太史范公文集卷第一

詩

樂通神明 御試

世治興和樂陽來符正聲純能格天地幽可逮神明
協氣流無外靈心識太平九歌人鬼享八變地祇迎
翕縱多祥集欣歡萬祉生湏知勲德大聖作掩英莖

春鮪初登 錫慶院試

風煦陽和候冰消水澤春乘舟施密罟登鮪薦明神
大壑翻紅鬣長波失錦鱗味叅籩實美羞與澗毛新
事異觀棠日時非濫泗辰猗歆潛有頌率職自獻人

遊先主祠堂置酒

驅車出郊坰涉溪上青岑峯頭野寺不足到先主祠
堂猶可尋祠堂之前流水長翠屏重疊搖清光老松
窈窕入雲漢五月鬱々炎天涼廟中女巫日歌舞神
去神來何處所龍吟虎嘯生風雲未似當時臣遇主
三分割據伯業開山河氣象皆西來功臣烜赫陵宇
宙顧眄可使強敵摧西南歷數俄遷改岷峨伯氣今
何在萬里浮雲卷壯圖空餘江水東流海山風吹月
海上來松間雲氣嗟酒盃高歌且醉一盃酒昔日英
雄安在哉此時分散已陳迹何足慘愴令心哀

四皓

南山石壁陵蒼蒼中有四老眉如霜中原龍虎困格
鬪九霄鸞鳳高飄翔赤精斬蛇入咸陽南極老人轉
遁藏一朝相顧下雲巘共為羽翼安儲皇白雲黃鵠
高飛揚雖有繒繳安能傷君王慷慨但飲酒戚姬起
舞無輝光古人不見雖已遠吾將杖策登崇崗

席上探題二首

紅蕉花誰植風流太守家爍々犀燈燃晚雨亭々蜜
炬照晴霞

秋夜雨點滴梧桐亂人語幾行寒雁起沙汀萬里漁

舟泊烟渚

資水

資水通巫峽誰家萬里船
隨雲排楚氣隱几上吳天
神女迷朝雨湘娥泣暮烟
何時一飛檝長嘯下牢邊

資中八首

劔閣橫空鎖蜀門
資中岩岫若雲屯
天傾白石_日千山
底峽東長江萬里_奔

資山岩谷多神仙
鸞車鳳馬隨飛烟
神女蕭々來暮
雨浮_止往々下雲駢

醮壇高倚碧天開
中有清都白玉臺
霧擁霓裳_旌乘月

去風吹仙樂下天來

五月江流萬賈舫
迅如飛電擘群山
荆雲峽雨須臾
過白帝江陵朝暮間

六月炎蒸烈火高
黑雲驅雨駕波濤
千崖雪浪飛泉
吼萬壑陰雲古木號

風定江澄境界開_閑
水清波影倒雲山
漁舟蕩漾清光
裏白鷺驚飛杳靄間

夷界荒山幾萬重
西窮月窟與天通
何時漢使還持
節從此乘槎上碧空

武侯祠廟遮空山
萬古名垂宇宙間
昔日南人皆稽

首至今歌舞聚夷蠻

資州路月山亭

軒亭枕蒼峯縹渺視空濶長江翻天去迴幹地軸折
洪濤破山門崖谷盡爭裂孤雲行無蹤飛鳥去自沒
遊子怨路長煩襟此披豁昔視黃河流浩蕩窺禹穴
乾坤何壯觀永歎舊遊絕茲亭雖非匹山水頗秀發
茫茫八紘內所歷但毫末安得乘飛颺人寰恣超越

資州路東津寺

寺有古佛殿唐乾寧元年所建

山行無晨暮日暝崖谷昏哀猿落客淚永路驚旅魂
憑陵高山巔俯視大江奔迴環島嶼合縈轉洲渚屯

行雲赴楚天飛鳥下蜀門地遐怪物聚寺古深殿存
憶昔李氏末烟塵暗中原姦雄競草竊割據窮海根
干戈百年後見此敗屋垣我來屬清秋登覽無俗喧
山深虎豹歸水靜蛟鼉騫臨風獨笑吒浩蕩欲飛翻

月夜舡行入資州

憶昨卧碧山蒼々叢桂間白雲為屏石為枕綠蘿長
掛明月間忽乘輕舟泛江水山月隨人還在此白鷺
驚飛宿靄間青山倒卧滄波底此時孤棹發中流川
后停波聽棹謳不學子猷中夜返欲乘明月向資州

七月五日熱退喜涼資中有懷二十四韻

仲夏金火爭陰陽勢相奪乾坤鼓洪鑪夸父死奔渴
普天無纖雲厚土万夫裂亭亭太陽午安得日車跌
清冷想寒門浩蕩思舞雪歎彼老農耕有苗不得活
乞雨禱潭龍望雲驅旱魃帝車俄迴指四序苦飄忽
木落天地秋清霜洗空闊涼風破閭閻勢欲卷溟渤
衆鳥盡不飛崢嶸見孤鶻登臨滌魂神颯爽動毛骨
因懷京洛間車馬填城闕紅塵暗天宇愚智共汨沒
出門無所適肝肺爲枯竭平生喜林泉瀟灑愛風月
滄浪有漁父逸步脫羈紲超然思遠遊千古訪遺轍
安能公侯間俯俸事干謁及來山水縣素志得少豁

白日拂雲眠芳蓀乘露擷尋山喜幽勝照水玩澄澈
雖無巢許操夙慕夷齊潔庶以保吾真無爲事其末

文潞公生日

天監仁皇德惟時嶽降神英姿脩文武賢業富經綸
夢賚求岩野于畋載渭濱三朝瞻上宰四海入洪鈞
謨烈重光啓樞衡萬化新珪璋扶日月劍履上星辰
述職分東陝宣威震北垠長城萬里遠奠枕四夷賓
自昔登儲后惟公秉國均川河賴舟楫霜雪見松筠
閭閻朝黃道雲龍對紫宸忠勲藏廟柘拓異禮冠臣鄰
風雨王城會烟花洛苑春麾幢近泉石袞繡出埃塵

照社祥光盛克閭慶旦臻御鑪薰黼黻天庑輟麒麟
帝念深元老邦基屬柄臣公雖慕前哲天欲覺斯民
左右蕭何手安危晉國身濟時歸壽域遐筭等靈椿

送趙清獻入蜀

上聖隆西眷中朝輟鉅賢三刀重夢寐四國賴蕃宣
自昔方隅遠惟公惠澤徧初撫字使節再聯翩
召父深仁浹文翁美化全南圖迴海浪北極上星躔
霖雨蘇羣物卿雲被八埏從容方論道引避不居權
忠馭何頻叱行帷又一褰漏天開霧雨燒棧掃雲烟
玉壘山橫雪羅江水映縣閣閣瞻冕服父老識旌旃

清靜嘗能理煩苛異畫蠲銷兵無吠警含哺但安眠
富庶寧加此功名固有焉豈惟私蜀土佇更秉陶甄

送聖徒入京兼呈紀常子進

二年隔京洛思見亦已久驪駒將戒行姑共一杯酒
君來買園林山川既富有顧我猶旅人安排卧林藪
不意嵩嶺雲輸君先入手謀生已知拙高遁慙居後
富貴等浮雲名聲似箕斗終當結茅屋鄰舍聞雞狗
杖履作往還過從惟野叟愛君修竹間一水似崖口
掃除石上月寒檜搖青箒早賦歸去來無為事奔走
前期知非遠同集待諸友寄我思洛詩東風想迴首

大雪入洛陽

昨夜關山雪僕夫晨起驚揮鞭騎紫馬曉入洛陽城
川原渺茫長嘯視八紘有如乘風馭迢遞奔玉京
伊水象天河雲濤向東傾喧然古都市沽酒吹玉笙
予心正浩蕩萬里赴歸程遙望嵩峯頂連天凍崢嶸
欲舉玉女憲舉手摩太清思之不可去悵望空含情

寄名山李著作

劍外雖云遠名山信日聞漏天常洩雨蒙頂半藏雲
萬里飛鳧鳥三年隱豹文茗芽春後好應許故人分

底柱四首

黃河傾落九天來底柱三山立欲摧崖谷吐吞成霧
雨蛟龍戰鬥作風雷

巨靈鼎、兩山開東放黃河萬里來地軸橫斜爭幹
轉天維歌側恐傾摧

禹開底柱放河奔濁浪軒、日月昏惟有三門君不
見驚波一起動乾坤

底柱初開禹力窮黃河從此去朝宗長鯨一噴連山
起岌業高於太華峯

望嶽

客行西入函關道秀氣東來滿關好北顧黃河天際

流回望荆山欲傾倒前瞻太華三峯高中天屹立爭
雄豪羣山朝嶽皆西走勢似長風驅海濤金天殺氣
何蕭爽羽駕颺輪應可往安得雲梯倚碧空上拂烟
霞看仙掌

希夷陳先生祠堂

太華朝紫清蓮花開綠烟嘗聞希夷隱欲學南華仙
道與寥廓友形隨變化遷餐霞倚八極御氣遊九天
靜夜披藥笈清晨漱瑤泉閒臨自谷嘯下拂雲寤眠
一朝玉棺墜委體同蛻蟬霓旌自宛轉羽駕何飄翩
空餘故館在遺像猶依然嗟吾生已後不得見當年

扶搖若可借永謝區中緣

望朝元閣

昔年曾上閣邁行步陵霞出太清鶴駕不歸雲縹
渺鳳簫空斷目分明秦州川錯繡孤烟媚渭水浮銀落
日橫惆悵重遊今未遂參差天半望飛甍

長安

東風吹塵客心起京華去蜀三千里我來踏雪走函
關下視秦川坦如坻曉登太華三峯寒憑高始覺天
地寬却惜京華不可見烟花二月過長安長安通衢
十二陌出入九州橫八極行人來往但西東莫問興

亡與今昔昔人富貴高臺傾今人歌舞曲池平終南
虛繞帝王宅壯氣空蟠佳麗城黃河之水東流海漢
家已去唐家改茂陵秋草春更多豪傑今無一人在
細觀此事何足愁不如飲酒登高樓秦王何苦求九
鼎魏武空勞營八州當年富貴一時事身後寂寞餘
高丘春風開花不易得一醉何必封公侯

過朝天嶺二首

夜上朝天曉不極舉頭惟見蒼々色迴看初日半輪
明下視嘉陵千丈黑
地崩天開此險成飄蕭毛髮壯心驚人間行路難如

此歎息何時險阻平

遊李少師園十題

松島

孤嶼何亭々蒼松鬱相對池中蛟龍起天際風雨會

芟池

向日鋪青蓋浮波散綠盤明珠洛浦佩白玉水仙丹

笛竹

鳳食實已美龍吟聲更奇惜無蔡邕識那得馬融吹

鶴

王子吹笙去仙禽下雲端夜棲松月靜朝舞檜風寒

水輪

崩騰噴雪浪晝夜無停息迴旋天磨轉運動日卓側

竹逕

整々植翠旗森々列羽衛微風羣玉動赫日蒼雲翳

蓮池

藻荇遍回塘芙蓉出清水紅燈迭照映翠蓋相摩倚

月桂

天寒桂子墮花發向庭中月華十二滿常照此芳叢

鴈翅栢

高枝含烟霧密葉張羽翼參差隨風勢慘淡入雲色

茅庵

結茅深林下門戶流水邊曉聽松風坐夜枕雲濤眠

和張二十五遊白龍溪甘水谷郊居雜詠

七首

君家蕭灑住園林更入青山逕路深唯有白雲為得

侶祇應流水是知音

松姿鶴性自宜閒天與幽竒避俗喧謝客風流臨海

嶠秦人歌嘯入花源

南窓高臨^卧看雲生日暮迴風動紫荊鼓吹不須過野

塢青蛙雨後自能鳴

田家何所樂野老飯蒿藜沙月鷺投宿松風猿亂啼
侵衣青竹冷拂面綠蘿低幽步無車馬唯應杖可携
石逕人行少山雲袖拂看水流情共遠天濶望隨寬
笙磬珍禽響龍蛇怪蔓盤洛川迴首處烟靄暮漫
夜靜月明溪水喧先秋風物已蕭然藤蘿作帳雲為
枕冷掛絺衣石上眠
青山跬步去無由唯有登臨可散憂浮世只知軒冕
樂幾人能得少時休

西街

西街春日永輦道與天通御水橫銀漢仙橋掛綵虹

草荒平樂館花發上陽宮擾々都門路輪蹄日向東

和子進六言二首

夜靜碧天如水山空明月隨人此興庾公非淺遠遊

王子何頻

蕭散獨遊何處寂寥四顧無人月露霑衣覺久水風
吹面宜頻

和子進千春院觀桃花二首

西度天津水見沙輕風飛盡綠楊斜相逢喜到千春
寺最後方開第一花富媪英華當間出東君照育想
非賒神仙高格黃裳色安得深根植帝家

鳳剎花光照碧霄
龍樓柳色暗朱橋
夸娥素月人疑
近姑射仙山路
豈遙琮玉溫
姿輕拂、鞠衣嘉色宛
飄、都人莫怪芳華晚
如隔烟霞在次寥

三月十八日雨後訪張二十五以詩見寄

次其韻

池上魚相樂林間鳥不驚
雨餘荷氣濕風動水紋生
俗客心猶爽高人興自清
何時作鄰里卜宅剪榛荆

又和再寄二首

青春忽已過白髮不須驚
招隱尋居士論文訪友生
到來塵慮息歸去夢魂清
尚想穿幽徑楸花間紫荆

花落春臺靜鶯啼曉枕驚
竹間流水過窻外白雲生
襟抱懷冰爽詩篇叩玉清
荒唐漆園吏環堵但披荆

張三十病愈久不相見以詩寄問

公幹清漳卧維摩
淨室居作詩心在否
問法意何如
臺榭花飛盡池塘雨洗初
劇談能強起便欲駕柴車
和張二十五春日見寄五首

綽約花無語間闕鳥自吟
及時須賞玩風雨不能禁
莫恨生華髮唯須不負春
風光無老少祇屬有情人

來詩云未
分生華髮

蕭灑幽棲地山嵐日夕昏
松風吹綠綺溪月湛清樽

白日春臺上歡娛莫許
孟飛花留客醉啼鳥
近人來
流水家々入修篁處々
同城南履道宅白傅
有遺風
和子進夏日憶寶上人

逕蘇鋪蒼錦林花落絳
趺山光入戶牖雲氣
起瓶盃
宴坐期三月迷行有萬
途寥寥方丈室一物更
應無

秋夜

月上霜威重烟消霽景
分嶺猿寒嘯侶澗鹿夜
呼羣
天靜纖毫見山空落葉
聞此時真吏隱高卧者
浮雲
送廷珍殿丞允通判閬州
十年京洛弄殘書喜見
西歸別駕車錦里追遊
頻莫

厭綵衣榮侍樂何如詔
條安遠民為本才刃如
君地
有餘不日還趨宣室召
伊川重訪野人廬

寄題傅欽之濟源草堂

傅公有幽居近在盤山
下清濟出其間白石明
可把
盈科赴溟渤習坎日傾
瀉竹色洗娟嬋松姿照
蕭灑
室有古詩書門無俗車
馬公居雖畎畝寤寐惟
朝社
雲山聊嘯傲魚鳥同遊
冶在我本無心羣生繫
用捨
終當入帝夢肖象求岩
野題詩寄林扃俚調慙
非雅

太史范公文集卷第二

詩

和蜀公紫薇花再發寄中書舍人

幾年幽獨飽風霜
一日榮觀似堵牆
地養深根成異
產天迴淑氣發新陽
賓朋湏醉千鍾酒
蜂蝶爭偷百
和香留得青氈真
舊物于今鳳閣有
名郎

和五十四翁登恩第後贈楊君章

力穡良農晚歲收
英名初喜動凝旒
光如劔氣斗間
沒文似河源天上
流莫歎黃金纔易
筭安知布被不
封侯

平津侯年六十
方對策擢第

暮年烈士心
方壯雙鶻搏風向

九秋

孫秀才下第暫還京口留別起居邀余和以贈行

翔鸞戢翼下層空南浦歸帆逐曉風
夢寐蘭陔清露白嘯歌江國火雲紅
王畿結綬來無久天漢乘槎去可通
莫為掩留銷壯節力行須與古人同

和蜀公八十歲自詠

衛武年將百僖公壽有千形
方通帝夢兆始見王田
白髮高山雪新詩清水蓮
福綏真樂只燕處自超然
濁酒中徐聖冷風御列仙
勁松臨絕壁獨鶴在青天

出處邦之望清虛性所便
老謀方眷用微物正思憐
漢室求園綺周家重天顛
雖懷箕穎志應未許終焉

答孫莘老病中寄謝諸同舍

言有逆耳忠藥有苦口
利康強本危慮憂患生逸意
先生蹈周孔陋巷樂仁義
新命登諫垣四方想平治
舞雩逐清爽伏枕送炎熾
作詩存警戒教告在同志
蒼天係正人丹宸渴高議
矧當敷經訓勸諭日嚴侍
栢榮太史尊鄭公三鑑脩
天衢進方亨王路坦無陂
告猷補袞職正色伏蒲地
陽城可以起醇酒毋數醉

春日有懷僕射相公洛陽園

闕塞當門外伊流遶舍西松筠不改色桃李自成蹊
穉筍穿堦迸珍禽拂面棲公歸卧林壑好作釣璜溪

和呂龍圖賀僕射相公

鼎鉉承家有慶基蒼生翹首聖神知韋賢世德傳經
遠衛武年華入相遲霖雨八方隨說命帶河千古誓
蕭規行者鳳沼原鷓集莫為旌麾滯朔陞

蜀公懇辭經席改領嵩宮賦以詩以代獻壽

累詔褒優免造庭兩宮虛竚想儀形千年遼鶴高華
表萬里雲鴻獨杳冥綺皓採芝終佐漢栢榮稽古舊
傳經真宮岑寂烟霞外南極光中作壽星

和門下侍郎東省夜直寄左丞光祿

黃閣訐謨作帝龍

門下之職蓋古納言

文昌綱轄振邦風群才

藻鑒歸能哲萬事鈞衡仰至公連璧光輝時共羨斷
金情契昔相同折衝千里精神壯正似山河繞漢宮

和子開從駕朝謁景靈宮

雨師汎洒霽光勻華蓋香風不起塵億兆歡呼真帝
啓謀猷左右盡君陳雲隨仙馭三山遠日出咸池六
合新一別都門變桑海來瞻原廟祇悲辛

瑤池真氣降東萊營室新臨渭北開載見辟王遐邇
至思齊任姒肅雖來龍胡尚泣遺弓劔燧火俄驚變

柳槐誰識九重宵
旰食中天雲漢望昭回

四月三十日慈孝寺山亭席上次韻經文
舍人送子敦都運待制赴河北

去年使河東飲餞天始秋
今年使河北復作蕭寺游
愧我燕居息送公頻按州
雍容鷓鷯列環珮鳴琅球
豈知勤徒御與國揚王休
譬如果適口安問梨與榴
此行功名會肯使歲月流
載酒都門餞行當迓歸輜

同子瞻送子敦赴河北都運次韻

顧公涉滄海宇宙觀竒偉
十年守沈冥應笑柱下史
動靜雖有殊要之蓋棺已
邇來拜東臺岩穴彈冠喜

昂藏出風塵壯志在千里
忽持虜使節急病仁為美
翰林出新詩風霆奔落紙
朝廷日清明君子慎所履
行當繼禹公洒災淡洪水
過我伊洛間松風醒俗耳

和張給事喜雨

玉座焦勞側席居
侍臣憂國盡應徐
宸心有感先離畢
星使分祈未下輿
觸石寸雲_寰寫_寓遍
稽天巨浸百川趨
不才太史那能頌
唯待豐年以喜書

又和張給事喜雨

瞻望昭回每夜分
崇朝忽起泰山雲
乾坤蕩暑如醒醉
江海生波想識紋
禁漏深迷天闕曉
朝衣涼帶御

爐薰時清封奏何妨簡猷納賡歌見愛君

席上分韻送天覺使河東以登山臨水送

將歸為韻分得臨

唐堯茹藜藿民俗猶憂深晉國壯山川羗虜皆外禽

宸心敬折獄使節慎所臨夫君臺閣舊舅空老翰墨林

松柏飽歲寒鷓鴣候秋陰攬轡上太行北風爽煩襟

當令桑棗地愁歎為謳吟二江帶雙流三峨聳危岑

何時早歸耕杖屨日相尋

謝賜御書詩五言十韻并序

臣今月十五日賜燕東宮伏蒙聖恩就賜御書詩一

首臣不揆荒淺謹賦五言詩十韻少謝榮遇之萬一

謹隨表上進

聖志探淵學皇慈示至仁論經窮古訓錫燕比嘉賓

天醴堯觴舉簫韶舜樂陳隆恩均近輔賜禮下嚴宸

洒墨星辰爛飛毫日月新聰明欽作后氣志儼如神

龍馬觀犧迹伏羲氏畫八卦始作書契延陵識聖真孔子親書有

字受藏輝鄩室榮遇極儒紳方講三王治思還四海

淳顧慙愚陋識何所補涓塵

殿試覆考和子由侍郎

十五年前宿殿廬伊川一紀卧岩居雕虫尚憶長揚

賦汗簡猶殘太史書日月瞻天瞻法座烟霞落紙看
當

和子瞻禁林鎖院昭賜燭酒

晨入金華暮浴堂聲容不動筆奔忙星間忽降龍銜
耀天上重分玉醴香是日早邇英講讀退以風寒賜
執政講筵官御酒是夜翰林又
被燭酒欲炮寒霄宮漏永半酣歸夢蜀山長起看絳
闕銀河曉山立千官拱未央

送周思道再知漢州三首

千山行盡見平川鷄犬相聞俗燕然晏父老共知仁聖
意十年重借使君賢

使君昔日撫疲羸曾奏囊封有直辭一卧家山今白

首重來猶擁舊旌旗

兩川相望各繁華二牧蕃宣出一家衣繡聊為鄉社
寵行看召節向天涯

送周正孺知梓州

先朝直節貫秋霜殿壁于今有諫囊汲黯猶煩卧居
郡馮唐何事老為郎山川壯麗開戎幕草木榮華過
故鄉青蓋從來宜白髮行看高步入明光

寄題蒲氏清風閣

閨山錦屏秀閣水碧玉寒高閣俯城邑飛甍出雲端

惟昔隱君子卜築慈考槃圖書俾藏室一一手自刊
山園養松桂庭砌被芝蘭霧深豹文蔚風壯鵬翼搏
來為廊廟重歸為里閭歡乃知哲人訓基構自艱難
我昔侍先君惜書嘗縱觀題詩尚可記手澤想未乾
爾來三十載感事一汎瀾側身西南望安得陵風翰

久雨中厨屋壞

我從山中來安宅豈敢卜窮秋積霖潦陋巷沒車轂
環堵不蔽風下林每塗是竈竈日已長釜魚時可漉
瓦解豈一朝糞土扶朽木中夜若崩山微軀憂壓覆
晨炊無尺掾慨歎食重肉益思反蓬茅終老依松竹

雲居蔭薜蘿野性狎麋鹿澗溪可濯飲薇蕨餘有藪
寧惟此寓館薄官同旅宿吾食敢求飽民生猶歎腹
囊空庶無寇困竭尚有粟墨突不暇黔誰能憂破屋

寄題穎昌王氏巽亭二首

危檻跨層城憑高俗慮醒鵬飛適莽蒼鴻去上青冥
隱地臨箕嶺賢游會德星躋攀何日共遠目寄郊垌
舊館懷賢躅先朝翊帝圖虹梁引層構血汗出奇駒
几杖延鄉老詩書問魯儒南天望雲氣應泣舜蒼梧

送道純歸南康

平生聞廬岳夢想入松門京華走塵土歲月空崩奔

縹思放岩壑枕石清心魂羨君歸舊隱山水當高軒
雲林對寢食烟靄變朝昏晴空天池溢瀑布銀河翻
竒觀窮宇宙夢澤可以吞少年負志氣海運期鵬鯤
晚登桂堂籍燕石可笑璵璠飄飄考城吏放浪彭澤園
迴首出都邑仙禽謝籠樊頽我老文史望天方戴盆
俛仰半世間同僚念金昆存亡已永隔風義古所敦
寄語謝嵇紹終慚山巨源

珍臺間館切昭回笙鶴應無俗駕陪天浸祥池三島
向春迷神圃百花開沙鷗汎々人相近風燕飛々準
莫猜清洛故園荒徑在與君何日賦歸來

同安誕日賦小詩祝延

海上蟠桃方結子月中仙桂欲生枝
須知陰德多餘慶仁者從來與壽宜

又

奕世登公衮羣生入化鈞
須知盛德後宜有正家人
今日垂門悅清風采澗蘋
兒孫環坐側歲々祝千春
送呂通直致仕南遊歸壽州

揆天疇昔阻雄飛未及耆年早拂衣
白日浮丘仙袂遠清秋范蠡片帆歸
京華歲月雙奔轂淝上滄浪一釣磯
况有孟光為道侶散花諸國叩岩扉

答劉中叟

十年卧伊洛半世老鉛槧君恩還故棲蠹簡幸窺覘
濫陪英雄游自覺山野僭有美劉夫子相逢樂無厭
騰騫入霜臺便若阻城塹朝言渴蹇諤民瘼待鍼砭
清詩叩哀玉孤秀出羣艷伐木激顏風佩蘭起幽念
願我久羈寓來如水鳧汎晨興三想川夕夢越雙劍
終當出都門瘦馬搖破鞵事業付公等斯言免為玷
和劉莘老贈王聖美三子姪補試太學聯
中高等
風流江左並淮原王氏衣冠不乏賢文似三珠才競

爽名如羣玉氣相連九秋鴻雁方遵陸萬里驂騮始
下鞭白髮星即推雅量似聞折屐喜成顛

黃魯直示千葉黃梅余因憶蜀中冬月山
行江上聞香而不見花此真梅也魯直然
余言曰不得此樂久矣感而賦小詩
江上清香隔聞水林間不見雪紛紛春寒忽憶登山
屐歸夢猶尋谷口雲

水紋扇

翦出瀟湘一片秋動搖君手向空流微風自有雲濤
氣夢入江天一釣舟

寄蜀州吳廷珍太守

紅旆前驅一舍間，里閭相望俗安閒。
春風城郭千家柳，落日樓臺四面山。
南畝勸耕丹詔遠，北堂侍膳綵衣斑。
梁園倦客思歸久，五馬何時命駕還。

臘後一日雪晴西郊

臘後寒威壯，春回歲律窮。
薄雲霏小雪，愛日解嚴風。
銀闕千門迴，瑤林萬里同。
誰能拂毫素，移入畫屏中。

寄華州提舉崇福李侍郎

洛社曾陪祭酒間，承明復接待侍臣。
班論交晚見松筠，操駐景長思冰雪顏。
純之服兔絲而有少容華嶽閉門窮簡冊

來書云閉門讀書所樂甚多 即堂隱几看河山，相逢一笑知何日

心逐飛雲出故關

李方叔饋潭筍

穿雲斲石遠林空，來涉烟波幾萬重。
實比梧桐堪食鳳，籜翻風雨便成龍。
一枝未許塵鞍掛，千畝終留渭水封。
陋巷菜羹知不稱，君王玉食願時供。

和李方叔惠嵩山木煎松黃

八公淮水留丹灶，四皓商山餘紫芝。
嵩嶺今成花鍊木，周原空詠董如飴。
容顏冰雪端能變，心肺塵埃信可治。
多病直疑生羽翼，更紆仙客上清辭。

右木煎

直幹千年老雪霜不隨群木四時芳冥冥黛色凝寒
碧冉冉雲英未嫩黃仙桂一枝聊比德幽蘭九畹幸
同香移文應怪歸來晚安石東山興未忘

右松黃

石耳

廬山五老峯下臨大江水絕壁千餘仞青冥洞無底
蒸雲自太古流雨洒千里日照層巔陽崖生石耳
採之懸繩梯磴蘚滑屐齒朱門登華筵味敵蓴絲美
小人勇趨利所得僅刀匕鴻毛輕軀命一墜即已矣

吾思窳群欲豈獨良其趾高深有前戒來者慎所履

太史范文集卷第三

詩

和張芸叟左司被賜資治通鑑

六世承平有史臣

班固稱六世史臣謂司馬遷

紬書東洛布成均

網羅遺佚三千載採擷精華十九春

天上思稽古憲章新烏臺御史辭離校頭白空餘汗

簡人以芸叟同校定

以芸叟同校定

送鄭閣中待制提舉洞霄宮

成均祭酒出儲胥歎息東門祖二疎頌我言非韓吏

部多公節似孔尚書諸生共惜陽城去三徑重開蔣

詔居琳館遙瞻霄漢外秋風一鶴上空虛

和呂原明上清宮落成

炎曆儲祥億萬年宮成四海共熙^然玉虛真境朝群帝

金闕冷氣^風下列仙初日翠華來照耀半天碧瓦欲飛

騫^騫已瞻聖孝勤三殿^{是日有旨親獻三本命殿遣官分獻更}

寫歡聲入五絃

送李邠州

文昌冠劍輟名卿書殿丹青得老成曉日旌旗熊虎

動秋郊組練雪霜明邠郊風教農桑國秦帝山河屏

翰城竹馬兒童應借問使君攬轡舊澄清

和門下相公從駕視學

堯天雲漢炳文章親學嚴師款上庠萬乘及門先降

輦諸生望日儼成行三雍盛典遵前訓千古元龜鑒

逸王儒服觀光真幸會為容深愧魯高堂

興龍節傳法院譯經御筵

誕聖千年日祈祥億劫尊祕言翻貝葉勝事集祇園

寶蓋天香住銀璫詔語溫曾無了義學空愧酌堯樽

送文周翰出守陝郊

維師謝公袞稷契仰高躅公子睠庭闈西郊作侯牧

飄颻丹穴鳳燦爛文昌宿雅望冠朝端妙年分陝服

絲衣照洛水紅旆驅崑崙谷荆山連太華翠氣堆群玉
長河從天來迴斡卷坤軸東奔觸砥柱北向摧平陸
壯哉山河固屏翰神明隩秦人亦勞止生氣日已蹙
兵戈困瘡痍賦歛苦敲朴使君得召父庶可飽饘粥
耕桑遍南畝禮義興比屋門前長安道日夕擊征轂
念昔西徂東經過厭結束爾來卧岩谷十載歸天祿
猶如閉樊籠恨未隨鴻鵠隱几思故山側身望喬木
何時拂塵衣假道西走蜀駐馬問甘棠歌謠聽淳俗

守歲

歲逐更籌盡春隨斗柄迴和風先傍柳薄雪暗驚梅

坐對燈花結歡吹酒蟻開莫嗟華髮短且喜一年來

和呂子進元夕

何處元宵好天街第一坊九重金闕外萬壽綵山傍
扈蹕凝祥島叶十四迎鑿資善堂叶十五帝城燈火滿歸
坐若禪房

原明官閒以余兼職良苦作詩見勞次韻
二首

忘言象外已無求應物環中自不憂
石傍觀傷手

斲尚應皮裏有陽秋右原明

野性從來麋鹿遊強加冠服祇為憂
何時放出樊籠

去定似飛鴻上九秋右言志

送秦主簿赴仁和

我思適吳越懷古意如何太伯振高風仲雍揚清波
緒餘有季子飢食玉山禾山水發奇秀古來英俊多
秦君淮海彥文鋒雄太阿早依蘓揚州匠手為礪磨
光芒侵星斗氣象奔江河青衫拾科第試邑佐絃歌
春水生南國扁舟浮綠羅方將剖蚌璞焜燿隨與和
我病久廢詩緬思眎庭柯徬徨戀紫闥歲月屢蹉跎
看君登朝廷奏頌助猗那為我謝蘇公先歸待江沱
和錢穆父尚書蔣穎叔侍郎從駕景靈宮

二首

紫嵩清洛映重闈

紫嵩清洛西都二館

舊隱荒蕪白髮新麋鹿

未能馴野性鸞凰何敢望前塵分班拜舞趨文陛扈

蹕賡歌紀慶辰共助成王廟太室朝慚非史佚奉明禮

寢廟威神挾正元

天興殿左右門名曰正元

初晨天伏下端門寒

生碧瓦氣蔥鬱日麗瑤輿景晏温霜露咸時知世遠

星辰拱極見君尊自怜多病思歸客唯有山川後夢魂

子瞻尚書惠涵星硯月石風林屏作歌以送之賦十二韻以謝

端溪干仞涵明星號山太古藏陰靈蘇公贈我此二
寶使我坐卧瞻雲屏我觀天地間有物皆流形或從
清空入幽谷中夜隕石翻階莫齊諧志怪不能狀欲
說但恐同優伶公遊浙江探禹穴長嘯宇宙臨滄溟
手攀天河弄星月醉落大筆還微醒故分星月入我
室光照窻戶風生庭長林偃絕壁晚色寒青冥似聞
洪濤卷萬木直幹幹不折當風霆玄雲欲落雪夜火孫
燈熒報贈愧無青玉案苦吟徒使鬼神聽

送蔣穎叔赴熙州

詩書謀帥得豪英去擁洮河十萬兵舒卷風雲為號

令笑談樽俎是功名胡塵不近彈箏峽漢月長懸細
柳營莫謂安邊無上策農桑千里見升平

和王都尉押高麗人燕射北園

天上星弧日射狼副車衣袂得餘香朔雲曾落雙鷗
羽遼海將歸萬里航酒灑堯觴賓已醉春廻漢苑漏
初長何郎拜舞思波渥花簇金鞍道路光

謝子瞻尚書惠墨端溪硯二首

禹平洪流錫玄圭班于羣神朝會稽遼東飛烟過滄
海徂徠古氣臨天齊丹砂化出黃金鼎雄麝焚身何
噬臍魚膠清堅豈易致燕支山北隨佩觿雙龍蛇蟠

戲欽月吳軍破甲光水犀墨雲如輪起端溪揮洒條
忽奔鯨鯢先生海內文章伯窮年蒿目憂黔黎玉堂
新製自心巧想見星象纏寶奎落毫無脛走珠玉雨
電霽止垂虹蜺陋儒窮經脣欲腐石室汗簡空沉迷
眼昏畫帋僅成字何異月閣投玻璃唯當藏作篋中
寶併荷蓑笠歸鋤犁

右墨

端溪清冥幾千尺玄潭噴雲噓紫石層空飛溜瀉珠
璣太古陰崖摧霹靂翦裁岩屏作風字琢磨水鏡成
月魄似聞松上颼颼聲一洗塵埃傾七澤先生每思
窮禹穴東叱天吳掛帆席山祇水若獻幽寶贈我不

啻千金壁玉堂金井汲寒泉坐視青天浸虛碧豈知
來從海嶠外鳥道穿雲下絕壁嗟我本自山中人慙
無辭藻對鄉客鄉人子雲思竒苦終老漢庭長執戟
至今舊宅有墨池何怪著書玄尚白行當提攜返敝
廬更廣牢愁弔遺迹

右硯

初到玉堂

舊廬風雨暗柴荆立整元無綬冕情一紀周南陪太
史八年殿廁桓榮陳編豈待傷麟止藻思那能倚
馬成空愧朱衣華髮吏玉堂三世見題名

院有老吏嘗引接叔

忠
祖文公叔父資政
今又引接入院

翰林寓直

雨冷絺衣初覺單
清秋寓直玉堂寒
濛濛宿霧昏鴉
鵲獵光風轉蕙蘭
蘇積書筠塵不落
雲生硯水墨
無乾十年曾向伊川卧
長憶間中夢寐安

夜直聞御溝聲

銀河秋馮月明中
雲卷風吹下碧空
終夕玉堂魂夢
冷蜀江聲繞水精宮

送陳元興侍御赴廬江

憶昔仁皇憑玉几
延和春晝神龍起
赭袍黃傘放諸
生却下紅簾半天裏
君為二驚衆人愧
我非才居後

後塵題名桂籍皆年少
有似鷓鴣毛羽新
爾來四朝三十載
相逢何怪容顏改
昭陵拱木鬱叅天
麟閣名臣幾人在
侍從同登白玉除
每思夙昔夢華胥
君今出作八州牧
千里旌旗引舳艫
淮陽卧治豈當久
宣室夜召終非踈
下車先表崔節婦
助我汗簡成新書

已孝肅公崔節婦居廬江

八月十一日夜玉堂對月

銀雲擲玉堂
明奩鏡初開
六合驚天卷
纖毫光不隔
風收萬籟夜
無聲蓬萊想像皆
雲氣宮殿虛無盡
水精一夕夢飛雙
劍外已疑身到雪山清

送七主簿赴龍水

山行水逶迤鬱屈如盤龍緣溪夾修竹被嶺多長松
懸門倚岩石終日對青峯初仕昔為宰讀書過三冬
忘機狎鷗鳥勸稼親老農訟庭可羅雀銅印蒼蘚封
邇來三十年夢想幽人蹤風塵京洛間色子或相逢
晚歲上玉堂天門深九重緬思寒潭碧一洗我心胃
送子西南歸恨無羽翼從為我謝邦人今愧白髮容

和子瞻尚書儀曹北軒種桔

蘇公滄洲趣日夕懷山陰公堂植珍木寄夢天姥峯
亭々碧玉幹氣象附喬林雷霆已難拔霜雪何敢侵

蒼皮卷鱗甲細葉抽鋒鍼稍出珊瑚枝中含笙磬音
鸞鳳待棲息詎肯容凡禽西風蕩積雨畏日方流金
潭潭宗伯府窈窕岩谷深北窓卧羲皇笑語合朋簪
蒼生望安石出處本無心萬象入毫端四溟納胃衿
文房俎豆列武庫矛戟森甘棠愛召伯勿使螻蟻尋
世俗多貴遠豈知古猶今他年老東山應記梁父吟
吏部彭侍郎召會馮少師園亭即席賦詩
門生猶記鑿龍登載酒東堂命友朋終日清談陪几
杖赤松况是坐禪僧

多病

多病心牢落驚秋鬢颯然風乾桐葉地雨冷菊花天
舊隱荒江漢新居俯澗瀍西都長夢想何日賦歸田
都成都西

九日寄諸弟

白髮宜新酒黃花似去年懷歸雙劍路極望九秋天
喬木西山外觚稜北斗邊遙知行樂處藥市隱真仙
綵旆籃輿訪隱高雲松雪竹想儀形函關應望真人
氣傳野今無處士星猶憶九臯聞鶴唳徒勞雙目送
鴻冥將迴俗駕頻搔首深愧山文舊勒銘

永州作

京華驛候遠楚越山川分心馳桂江水夢繞蒼梧雲
夕與木石居朝遊麋鹿羣聖治踰繩契皇明軼華勳
炎陬暨海表休氣塞無垠羈臣免幽繫何以答恩勤

御製太皇太后挽詞四首

任姒基王迹塗莘首化風德超千古上治定九年中
日月無私照乾坤不宰功寧神登太室永佑宋無窮
定策元豐末勞謙聖烈光外家深自抑俊德盡明揚
恭儉隆三世寬仁覆萬方功成身不處仙駕白雲鄉
天祐周邦世仁篤生文母濟斯民嗣徽慈后光宗

祖配極英皇育聖神崇慶垂衣寧寶祚延和負宸翊
冲人長言永慕遵遺訓要在齊家與正身
八荒同軌壽原成雨露俄悲歲律更曉日曛曠開鳳
翊春風縹緲轉龍旌晨朝尚想趨金殿駸馭難留返
玉京寶冊形容雖四字誰知盛德莫能名

臣奉 御寶批撰挽詞四首進入內兩首七言兩
首五言謹依 聖旨撰進

古今詩體多以五言在前伏乞裁酌

太皇太后挽詞二首

誕保天基命光開帝永圖軒星臨斗極堯日上雲衢

美化形風雅成功入典謨群生何以報損壽濟寰區
授几咨元老垂帷攬衆賢舜功成二十周士得三千
德澤流終古規摹遺億年寧惟照彤史石室爛青編

又三首

九載扶皇業三朝賴母儀成乾功不有並日照無私
天上軒星暗人間薤露悲君王自仁孝舊典奉元龜
治道初無事齊家與正身練繒躬至儉行葦被深仁
受冊辭隆禮為霖屬老臣太平遺德在白首泣堯民
能助君成聖惟知諫必從徽音推二后盛治見三宗
虛宸翔丹鳳仙輜駕玉龍淒涼厚陵路墓木拱高峯

王岐公挽詞三首

景運光華際洪鈞十六年文明憲前古禮樂被敷天
有美經邦業無成載物權易曰地道无成而代有終君臣時契會
俛仰逐流川

乘雲仙馭遠出震帝圖新百辟瞻元宰繁機伏老臣
中天扶日月拱極失星辰終始先朝遇勤勞至没身
王儉風流相岐公博瞻資唐相杜佑敷文成國典亮
采作官師劔佩空黃閣音容想赤墀元臣葬禮盛簫
吹朔風悲

王開府挽詞三首

聖曆當千運天庭第一人榮光親日月優寵極臣鄰
賈馬推先進夔龍接後塵藩垣賴耆德宣力至終身
康寧五福備出入四朝安劔佩逼台室旌旄登將壇
天池將浴鳳雲漢擬駮鸞縹緲陵霞意今成逝水嘆
連帥諸侯長維師列爵隆儀刑憲萬國眷禮視三公
白日年華盡浮雲世事空九原伊洛上松柏自悲風
司馬溫公挽詞五首
伊呂為時耦夷齊得聖清精忠貫日月至行格神明
微物霑仁澤窮荒服德名湏知千載後瞻仰重嵩衡
文母扶皇運成王紹慶基蕭公翼左右裴相係安危

共恨登庸晚，俄成殄瘁悲。旂常紀勲業，長與日星垂。
上相經綸日，羣生化育中。初開仁壽域，重立太平功。
海寓還淳俗，朝廷復古風。英靈在王室，應佑宋無窮。
盡瘁憂民瘼，孤忠簡聖心。忘身甘首疾，報國競分陰。
天奪揚公速，人思召伯深。秋風咽笳鼓，行路泣成霖。
自昔龍門峻，叨蒙國士知。紬書陪太史，問學仰宗師。
一紀依林壑，千秋隔履綦。餘生愧簪紱，無路送靈輜。

韓獻肅公挽詞三首

孝友天生德，公忠世象賢。八元推亮采，四海入陶甄。
粉杜棠陰老，槐庭棣萼聯。諮詢賴黃髮，零落已重泉。

舜禹勤勞治，臯夔翊贊功。秉均瞻上宰，憲老佚三公。
壽考登耆耄，哀榮備始終。淒涼潁川路，蕭鼓愬南風。
東閣開無倦，西園宴不疲。蒼生望安石，多士美當時。
功業歸青史，音容閔總帷。烏衣門巷在，過客有餘悲。

李朝議挽詞二首

美行高山老，高年渭水翁。政留循吏迹，家有古人風。
操几門庭在，安車里巷空。子孫皆孝養，餘慶自無窮。
解組紅塵外，忘機白日遲。烟霞隨步武，松竹想風姿。
沆水流清範，盤山厚福基。鄉人應配社，猶恨不期頤。

鮮于諫議挽詞二首

西蜀文章老中朝侍從臣諫垣風烈在書殿寵光新
宣室虛前席清漳歎病身致君才未展青史迹空陳
白首方登用忠規溢皂囊仲山違袞職汲黯卧淮陽
墓劍知誰掛人琴竟兩亡猶思挺直操松柏凜秋霜
哭司馬公休

中書侍郎傅公挽詞

昔在西都日趨庭見伯魚金華同勸講石室共紬書
鮑叔深知我顏淵實喪予衰年哭心友忍復望靈車
岩野為霖後千年復有人累朝推鯁直二聖倚絰綸
盡悴憂民色孤忠許國身徐公德不變可使俗還淳

洛社瞻賢躅書筵繼老成公昔免講改侍讀聲容陪
夙昔論議想平生節與盤山峻名隨沆水清草堂空
舊隱松月為誰明

常大夫挽詞

禮樂追先哲文名動縉紳忠勤白首節惠愛遠州民
石室詩書在天衢日月新九原何所憾有子嗣芳塵
王承事挽詞

井絡西南奧今無處士星天真養恬漠世累出塵冥
松菊陶公徑詩書孔氏庭傳家清訓在潛德繼先銘
先生考官教蜀郡忠文公為銘

太史范公文集卷第三

三

六

太史范公文集卷第四

表狀劄子

辭免兼侍講狀一元祐元年九月

右臣準閣門告報除臣兼侍講者臣伏以邇英勸講
職參近侍必得耆哲之士端方之人日新輝光仰備
顧問臣語學則不足議行則無取承命愧恐不知所
為矧今名儒碩德並在左右啓發聖學不無其人而
臣自知最為淺陋頻蒙議擢未有報稱輒玷茲選實
非所堪恐無補聰明之萬一適足以累朝廷之公舉
乞還誤恩庶厭清議

右臣準尚書省劄子奉 聖旨不許臣辭免兼侍講者臣不唯學不稱職恐無以塞責而義有未可不敢不言伏以 陛下深居九重不見聲色唯以大公至正身先天下進退黜陟以明好惡將使人知廉耻興禮義也至於風俗厚薄人情美惡則凡為士者皆預其責是以臣之素心官不敢虛受利不欲苟處恐傷廉耻則敗風俗上累國體罪之大者也而臣擢於小官無尺寸之長期歲之間薦蒙褒叙史闡記實濫備討論經幄敷言復俾陪侍雖 陛下選用義不及私

而臣有姻戚之嫌敢不自列臣妻父呂公著方秉國政雖在臣職業所不當避而於臣情分則有未安竊恐仰累至公下負夙志豈可冒昧先諸儒而進乎伏乞 聖慈特賜矜察追寢成命庶使迂拙少安分守臣不勝拳々之愚謹再具陳免以聞

實錄院乞避親狀

右臣伏覩已降 勅命差尚書右僕射呂公著提舉修神宗皇帝實錄伏緣公著是臣妻父於條合該迴避伏乞罷臣檢討之任謹錄奏聞

乞給假至穎昌狀 二年六月五日

右臣伏為臣親叔祖端明殿學士鎮行年八十居穎昌府多苦腹疾近以次子喪亡憂傷尤甚臣之私情實所不安欲望聖慈特賜給假旬日暫往省之不敢久妨職事謹錄奏聞

謝賜銀事

狀

右臣伏蒙聖慈以臣請假往穎昌府特降中使宣問賜臣銀壹伯兩臣無任感天荷聖激切屏營之至

奏知狀

右臣今月十一日入內侍省內侍高班李正臣至臣家傳聖旨以臣請假往穎昌府賜臣叔祖鎮實

封御前文字一封實封銀合一具令臣齎賜臣已依聖旨收領謹錄奏聞

奏為將到臣叔祖鎮謝恩表狀

七月

右臣昨蒙給假往穎昌府準中使傳聖旨賜臣叔祖鎮實封詔書一道龍茶一銀合因令臣宣問臣今將到臣叔祖鎮謝恩表二道詣通進司投進

謝講論語畢賜燕表

九月

聖人之言高弟所記王者之事大學為先永惟百世之師實首六經之訓顧慙陋獲侍清間方迨終篇曲蒙飫賜恭惟皇帝陛下務學時敏作德日親新

邇儒臣懋昭聖志以為學舉直錯枉則萬民咸服克已
復禮則四海歸仁取法於堯必則天之惟大思齊於
舜當恭己以無為尊其所聞終之無倦式頒禮食昭
示龍光臣等咸備邇聯預霑慈宴屬厭知愧盡瘁為
期
又謝賜御書詩表
宸暉熙爛聖禮飛騰拜手受藏震驚喜抃臣聞孔子
稱堯之德曰煥乎其有文章書稱舜曰濬哲文明詩
美文王曰倬彼雲漢為章于天周公多才多藝孔子
將聖多能論語曰志於道據於德依於仁游於藝書

即六藝之一也古之聖人莫不以好學為先游藝為
美恭惟皇帝陛下聰明天縱睿智日躋嗣膺大統
于今三載間御便殿延對儒臣敷求經訓啓發聖學
雖太冬盛夏肄業不輟臣竊觀陛下容止周旋動
必中禮垂拱淵默性唯合道終始如一日進無疆四
海之人方翹首以望輝光之傾新耳以聽問譽之隆
然在廷之臣未有被親札之賜者臣以末學濫備勸
講適終篇秩無補涓埃預蒙優恩加賜燕勞忽頒宸
翰獲覩飛毫乃知陛下閒燕之中留神筆畫研精
儲思欲臻其妙臣願陛下篤志學問亦如好書益

進道德皆若游藝則聖神可至事業可成如天之積
高地之積厚廣大深遠不可測也臣不勝拳_少之愚
敢以此謝謹當傳之子孫以為永寶夙夜思職以圖
報稱

謝開寶^實錄院賜宴表 三年三月十七日

編摩云始燕衍遽頒祇荷詳延伏深震懼臣聞繼志
嗣訓以為孝記久明遠莫如書 先帝之御萬方僅
踰七閩信史之示後世動流億年顧以頑踈誤當屬
任和鈞就職未知書法之謂何折俎示慈亟荷 聖
恩之特異均頒者核詔集措紳事雖故常寵實優渥

此蓋伏遇 皇帝陛下紹承先烈祇適燕謀瞻望西
陵永悼威神之不復論著東觀將傳功德於無窮魯
未濡毫特先置醴徒重太官之費豈有良史之才思
稱所蒙敢忘自竭表裏詩書之策為法具存畫繪日
月之光強顏何已

謝太皇太后表

信史誕脩息筵顯設仰膺寵獎內切兢榮伏以先
帝之盛德成功群臣之嘉言善行將傳永久爰命討
論敢意孱虛遽叨屬任龍胡已遠強圖日月之光鼠
技未陳猥被雲雷之施此蓋伏遇 太皇太后陛下

思光往緒垂裕來昆矚茲傳信之勤加以示慈之厚
編摩代匱雖有玷於甄收尊閣視成庶無慙於器使
謝開寶錄院賜銀絹表

紬繹信書方謹編研之職分頒厚幣遽霑優渥之恩
拜賜無功受藏有覲此蓋伏遇 皇帝陛下纂隆下
武追孝前文仰惟丕顯之謨莫重不刊之典將以示
億年之永久齊 列聖之休光頌忝司存誤膺詔委
眷開編而首事加實篚以示慈才乏三長方懼曠官
之責恩均九式實叨懋賞之私冀竭微勤上酬鴻施

謝 太皇太后表

職當載筆方紬垂世之書賚及有家忽降自天之澤
便蕃所被揚厲靡寧此蓋伏遇 太皇太后陛下勤
治萬方詒謀億載保佑重光之祚緝熙前烈之文申
敕攸司發揮大典頌循譎薄誤玷選掄眷茲簡冊之
初優以金縉之賜先事後得懃勸賞之遽加廣記備
言惟服勞而仰報

謝開寶錄院賜硯墨筆紙表

典司太史論次新書頌在諸儒已塵盛選遽拜出中
之賜采深載筆之榮此蓋伏遇 皇帝陛下茂烈謹
於丕承達孝資乎善繼發揚 先帝甚盛之蹟圖示

萬世無窮之傳以臣等預游著作之庭並給上方之
札抽毫執簡使備於編摩抱槩和鈔適資於潤色將
何報稱祇益兢慚思繪畫於乾坤固知不可裨涓塵
於海嶽勉竭所能庶集微勞少酌洪造

謝 太皇太后表

伏以發揮天地之功潤色聖神之業自昔文章之用
叙事尤難方今儒學之官細書為貴願慚陋輒冒
詳延屬藁云初拜嘉有腆此蓋伏遇 太皇太后陛
下垂精大典貽訓後人發禁省之珍藏循書林之故
事陰山堅石之璞上黨芳松之烟妍妙曄光水苔之

質圓和正直秋兔之毫曲示優恩併推異數寵靈甚
渥報稱謂何誓殫夙夜之勤少答龍光之厚

辭免除起居舍人狀 一 四月

右臣今月二十日準閣門告報已降告命特授臣守
起居舍人者臣竊惟左右二史選擢尤重文學之士
號為顯塗方 陛下延登眾賢式序在位臣以菲才
謬膺書省同時並直前輩猶多而臣幸得執經日備
顧問夙夜惟念無補聖學其敢過貪榮寵以速罪戾
伏望 聖慈收還誤恩旁求俊良副茲慎簡如臣淺
陋實無以堪所有告命未敢祇受

右臣準尚書省劄子奉 聖旨不許臣辭免起居舍人者承命震恐不知所圖臣以侍經職在左右豈敢過為矯飾煩瀆至於再三直以誠實上千天聽伏念臣賦性朴愚臨事不敏往在書局十有五年不敢有榮進之心述史之餘粗不廢學至於辭藻實非所長是以前此蒙恩除授著作檢討乃至經筵兼職苟可勉強不敢固辭今蒙 陛下擢寘西省俾之執筆記言日侍殿陛臣不唯非才無以當此美職竊聞舊例中書舍人若值假故則以次記注之官當權草制臣

實無敏疾應猝之才不敢以所不能貪冒天寵龜勉就命瘝官塞職為罪滋大是敢先事自列不避重誅况臣著作已為史官勸講亦參近侍敷陳經訓以承聖問常懼不足敢有二事以及其他伏望 陛下矜察特賜寢罷今來恩命臣謹當窮思端精專意所職庶有微益不負聖知

右臣近兩具奏辭免除臣起居舍人恩命準尚書省劄子奉 聖旨依前降指揮不許辭免者臣非不知煩瀆聖聽稽違君命邦有常刑然臣以才性遲鈍不

能及人竊自惟念累年以來荐蒙褒擢未有報稱今
茲進職漸階近侍實懼無以堪任伏望陛下察臣
肺肝令臣且守舊職責其報效若臣朴學少有補於
聖德在臣所願勝於遷兩省之職多矣所有告命臣
必不敢祇受伏乞早賜俞允

四

右臣準尚書省劄子奉聖旨依累降指揮不許臣
辭免起居舍人者聖恩深厚無有窮已非臣隕首所
能上報重念臣實以文字遲澁不工如前所陳乃其
平時素心不敢冒昧由此以進臣今若就職將來或

未以罪斥則文字之任無說可辭若謂今日可以且
受而俟他日堅辭則是臣緣此美職以為進取階梯
然後却辭他日差遣懷利事上不唯臣所不敢陛下
下亦何所用之伏望聖慈察臣至誠實非矯激特
賜追還所授免更辭費上瀆睿聰臣無任兢惶迫切
之至

申三省狀

右某近準閣門告報蒙恩除授起居舍人前後已具
四奏辭免備述誠懇決難祇受伏乞特賜敷奏早降
指揮追還告命免至辭費上瀆朝廷謹具申三省狀

候裁旨奉五月八日三省同

請假往潁昌狀元祐四年二月七日

右臣有親叔祖故端明殿學士贈右金紫光祿大夫
臣鎮不幸考終卜以今年三月一日葬於潁昌府陽
翟縣臣欲暫請朝假旬日往赴襄事不敢稽違以妨
職業伏望 聖慈特賜矜允

辭免召試中書舍人狀一三月

右臣今月十四日奉 聖旨召試中書舍人者聞命
震恐不知所從臣以凡才謬塵史職後緣朴學進侍
經惟至於文詞實非所工今茲給札以備代言之選

大懼無以厭塞士論輝光帝猷兼臣昨已辭起居舍
人之職今不由記注直俾試言天恩過隆弗循舊典
在臣愚分豈敢克當伏望 聖慈特賜寢罷召試指
揮臣無任祈天俟命懇切之至

二

右臣今月十六日奉 聖旨不許辭免召試中書舍
人者伏念臣昨蒙除起居舍人非敢辭記注之官實
以文辭不工竊恐誤被書詔之選故不敢冒昧榮寵
乃是 辭今日之試也陛下不以臣為菲才仍降
召試之命臣若就試則寧如前日勿辭且前日之辭

是則今日之試非今日之試是則前日之辭非前後
相違何以事上臣雖至愚實不遑處伏望 聖慈察
臣懇誠特賜寢罷今來指揮庶安分中敢不畢命以
報聖知

辭免除中書舍人狀一

右臣近兩具奏辭免召試今準閣門告報已降告命
除臣中書舍人者非常之恩不赴^試而投震懼隕越無
所自容臣伏以 祖宗以來用人有序必記言動乃
司訓誥舉以次則人不競取以試則下不偷所以示
名器之公嚴侍從之選踵為故事未之或渝唯是文

章宗工人望久屬館閣舊老士論共推或絕倫之才
躡等而進不待試可曾無幾人以臣方之何能為役
况乃辭記注而特召辭召試而直除何以厭服人言
答揚 聖選而復遂格召旨又隳故常啓僥倖之塗
喪廉隅之節皆自臣始誠何敢當伏望 聖慈察臣
悃悞追還新命俾安分守免更瀆煩天聽愈重罪戾

二

右臣近上奏辭免除授中書舍人恩命準尚書省劄
子奉 聖旨不許辭免者竊以內史文學之選號為
清華秉筆之士無不願慕臣遠方孤生讀書仕進心

非木石豈不求榮况自臣叔祖臣鎮叔父臣百祿皆由科第歷踐此官今臣非才復被誤恩若一日就職遂為三世掌誥豈非寒族之寵小已之幸實以詞學荒落才力有限久脩修書之職復參勸講之任粗容朴拙勉冒居昨蒙選授右史非謂不能記錄言動正恐循次而進用承人乏用以先事瀝懇至於數四及召旨期於必辭不圖天恩更越倫等重念臣始辭記注實辭召命既辭召命實辭此職合若祇受自食其言前之所辭皆為虛矯豈惟愚臣心知不可實亦清議皆所不容伏望聖慈矜察本末早賜追還

新命

辭免除諫議大夫狀 四月

右臣今月四日準閣門報已降告命授臣試右諫議大夫兼侍講充實錄修撰者聞命震恐無所自容臣聞三代之時自公卿至於列士皆有諫職降及後世乃特置官祖宗以來尤慎此選必得忠正之士骨鯁之臣言足以廣君心學足以知治體乃不誤於耳目而有補於聖明苟非其人無以重國臣識智淺陋心力衰疲受恩不貲無裨毫髮近蒙選授內史榮參法從臣愚竊欲專講勸之任不敢復兼書詔之職是

以不避煩瀆至於懇辭伏蒙天恩曲徇誠請不圖求
諫之廣下及芻蕘擢寘西省責任愈重大懼無以補
衮職之闕塞措紳之望內自揆省實非所堪伏望
聖慈特賜追寢令臣且守舊職所有告命不敢祇受

謝諫議表 五月

從大夫之後以諫為稱近天子之光唯言是職顧慙
譎陋深積兢惶伏念臣識智甚愚資才不敏久玷道
山之籍獲趨便坐之班入則執經奉一人之典學出
而紬史紀先帝之成功非堯舜不敢陳於前庶文
武尚未墜於地螢爝無裨於日月涓塵何補於山淵

已叨儒者之榮復被爭臣之選付之言責寵以服章
俾圖報國之忠未識隕身之所此蓋伏遇 皇帝陛
下聰明時憲聖敬日躋體軒皇敦敏之仁躬帝學靜
淵之德思聞讜議深沃清衷兼收一介之微進備七
人之列重念臣自陪經席日侍威顏曾無稽古之能
每荷虛中之聽唯畢精而竭慮嘗廢寢以忘食矧今
眷遇加隆事責彌重敢不益勵首公之節不移介石
之誠冀畢餘生仰酌洪造

謝 太皇太后表

后從諫則聖俾服在於邇僚臣責難日恭敢不祇於

休命覲顏而受思職惟憂伏念臣遐逝孤生顓愚懵
學賜第仁皇之末紬書神考之書初天祿三年周
南一紀唯弊精於蠹簡敢覲幸於榮塗迄奏終篇召
寘儒館荷大德之廣覆兼收細微屬睿明之統臨旁
燭幽隱史闡記實濫備討論經幄敷言復參陪侍負
戴有丘山之重勤勞無毫髮之微擢右史之華資進
西垣之近職皆從懇避特出矜容竊希散秩之安乃
被爭臣之選朝無幸位義不辭難仍服不稱之衣越
處非據之地此蓋伏遇太皇太后陛下母臨萬國
坤載群生思齊任姒之功誕保成康之聖建大公而
在上登衆正以交修明目達聰來直言於遠邇獻可
替否圖庶政之中和重念臣爰自下僚以躋近列每
膺除命皆出宸衷徒堅報國之心未獲隕身之所異
殫微力上答鴻私

舉自代狀

右臣伏覲朝散郎守尚書禮部郎中陳軒資性耿介
志守廉靜學以為己不求人知使居言責必有所補
臣實不如舉以自代

太史范公文集卷第五

表狀劄子

乞避親狀 六月八日

右臣伏見戶部尚書韓忠彥已除尚書左丞緣臣妻是忠彥妻之堂妹於條合行迴避謹錄奏聞伏候勅

旨許迴避不得為例

上殿乞避親劄子延和殿進呈

臣近奏乞與左丞韓忠彥避親準尚書省劄子奉

聖旨特不許迴避者臣竊見近歲言事官與執政有

親不以戚踈近遠例皆迴避今蒙 陛下待以不疑

在臣愚分尤難安處伏望 聖慈特依近例許臣迴

避

同吳司諫上殿宣論云卿等公心必不
為親戚不言且為官家文字不須進入

辭免中書舍人狀

七月八日

右臣準閣門告報已降告命除臣中書舍人者臣蒙
陛下擢任諫議職未及兩月曾無毫分之補職事實未
舉修夙夜以思未知所處今蒙進擢西省華要之職
在臣愚分深不遑安兼臣自去年蒙恩除起居舍人之職
凡四次辭免今年三月蒙召試及免試除職亦四次
辭免前後不避瀆煩天聽實以文字不敏不敢當書
詔之職今臣愚執與前無異伏望 陛下天地之恩

察臣累辭出於至誠特賜追還告命臣無任惶懼俟
命激切屏營之至

辭免給事中狀 十月八日

右臣準閣門告報已降告命除臣試給事中者聞命
震恐無所容措臣竊以門下封駁之職最為要塗比
虛其員蓋重此選臣自居言責曾無裨補萬分之一
今超越西垣擢置左省臣不唯才識愚陋所不敢當
在於義分亦不遑處伏緣臣近上言回河不便乞罷修
河司實係生民休戚數路安危未蒙朝廷辨別臣之
所言是非若臣是乞賜施行若臣言非即當顯黜而

論列未及累日遽蒙進官由臣菲才不能稱職內省
愆咎唯俟譴誅豈敢貪冒復當遷寵伏望 聖慈特
賜追還新命除臣一外任差遣

二十三日

臣近奏乞追還除臣試給事中恩命除一外任差遣
準尚書省劄子奉 聖旨不許辭免者睿恩深厚天
地難踰臣義有未安敢避煩瀆伏緣臣近論回河不
便乞罷修河司臣所引 先帝詔書及 陛下昨降
罷修河司指揮及中外人言皆以為非便臣不知大
臣何以止信一李偉之言遂不用 先帝詔書及却

改 陛下先降指揮一切不恤人言而無故興大役
動大眾困擾數十州生靈將來河不可回民不堪役
何變不有何事不生為無窮之費又有無窮之害而
章奏纔出未及累日遽蒙優遷臣竊惟 陛下設置
諫官責之以言欲得其忠益若不然其言而復進其
官將何以來天下鯁直之論亦非朝廷黜陟之典諫
官以言責事 陛下職在於救正若忘其職業而唯
貪寵利 陛下雖不以為罪臣亦何以勝中外四面
之責哉伏望 聖慈特賜辨別臣言之是非然後議
其升黜則臣之幸所有告命不敢祇受

三 二十日

右臣近兩具奏辭免除臣試給事中恩命準尚書省
劄子奉 聖旨依前降指揮不許辭免者螻蟻之誠
未回天聽伏念臣入侍經幄於今四年擢居諫垣及
此累月豪分無補夙夜不遑遽被誤恩進升左省名
品加峻班秩增隆人臣事君誰不求寵臣以有言不
效得罪為宜是以傍徨未知所處伏望 聖慈特賜
追還告命除臣一外任如朝廷姑務含容即乞改授
臣京師一閒慢差遣二十一日內批依前降指揮
不許辭免二十三日受告
謝給事中表

言責無補宜加詰誅寵典惟行乃被褒進辭不獲命
以榮為憂臣聞帝舜命龍作納言夙夜惟允仲山補
王之袞職喉舌是司門下之官蓋本於此號令之所
出納政刑之所慘舒 先帝董正羣司分置二省封
駁之任選授尤艱 二聖並明萬邦承式職業粹於
群下治亂在於庶官臣以庸虛入侍勸講謬塵法從
之末濫脩爭臣之聯曾無藥石之言上負耳目之寄
遽從西省擢處東宮其臺此蓋伏遇 皇帝陛下大學日
新至仁天覆淵默守道垂拱視成慮一二之萬機差
毫釐於千里罔兼庶慎自爾師虞黎獻共為於帝臣

群僕交修於后德不遺菅蒯俾効涓塵謹當風雨不
渝冰霜自厲庶竭餘生之力上酌鴻造之私

謝 太皇太后表

備員諫省曾無補衮之勤進職瑣闥誤被出綸之寵
祇膺褒序深積兢惶伏念臣才不逮人學非造理唯
知竭盡以事上不敢低回而愛身進偶休明擢升侍
從濫處七人之列輒希五諫之功終非藥石之良詎
有涓埃之益復因人乏冒進官榮升東掖之華資筦
納言之要地恩無虛授禮有固辭尚不至於嚴誅終
莫回於成命覲顏而受居寵惟危此蓋伏遇 太皇

太后陛下德協勛華功齊任姒建大公而御極守至
正以治繁登進群才緝熙庶績乾坤至大曲成物以
無遺日月有明在容光而必照顧臣孱瑣亦預采收
益堅匪石之心庶效捐軀之節

講筵乞避親狀 五年三月二十二日

右臣伏見新除臣叔尚書吏部侍郎百祿侍讀臣竊
以叔姪並侍經筵近世未有此例於臣私門實為榮
遇在臣愚分豈敢違安伏望 聖慈許臣迴避特罷
講職

右臣近上奏以臣叔百祿兼侍讀乞罷臣講職準尚書省劄子奉 聖旨不許迴避者臣竊惟 陛下置講讀之官以備顧問若稍涉物議則無以輔導聖德今臣叔姪並侍左右求之故事未有此比豈敢貪榮以自取戾伏望 聖慈特許迴避

三 四月一日

右臣近兩具奏以臣叔百祿兼侍讀臣乞罷講職準尚書省劄子奉 聖旨依前降指揮不許迴避者臣伏見太學博士吳師仁德行純懿經術淵深修身慎獨非禮不動朝廷起之布衣授以學職宜在左右敷

陳前訓伏乞罷臣講職擢用師仁稽之士論必以為允敢望 聖慈特降指揮

乞避親狀 五月二十六日

右臣伏見司馬康除左司諫臣有女許嫁康之子承奉即植於今月二十四日已行定禮準敕官員親戚職事相干並迴避今臣與康門下後省及講筵所實錄院並職事相干合迴避伏乞罷臣職任以協公議乞免館伴狀 六月十八日

右臣今月十八日閣門告報已降 勅命大遼國賀坤成節人使到闕差臣克在京館伴使者伏念臣久

苦脾胃之疾經年不愈造朝供職雖粗可勉強竊恐
應問對使客以病闕事伏望聖慈矜允特賜改差所
有勅命臣不敢祇受依奏

乞郡狀七月二十四日

右臣輒傾愚懇干冒宸嚴仰恃矜容未即誅譴伏念
臣自去夏傷冷得脾胃之疾經涉一歲有加無瘳又
積年苦暑暘之病重以腹疾殆不能勝近累在假曠
廢職業緣臣賦命羈薄受才拙艱誤被獎擢叨塵侍
從寵祿已過災病益侵况臣入官以來止為試銜知
縣一任自熙寧後專以修書為職未嘗履歷州郡官

政民事多所未知伏望聖慈察臣悃誠憫臣延劣
特除臣京西一閒郡使之自效因得休養疾病若幸
痊愈未填溝壑誓竭犬馬之力圖報天地之恩

二八月一日

右臣近上奏乞京西一閒郡自效因得休養疾病準
尚書省劄子奉聖旨不允所乞者臣私懇迫切不
能自己再瀆天聽無所逃罪伏念臣識智凡近學術
疎淺陛下過聽誤加狀收擢入侍經席於今五年記
實史闡亦既再聞臣非不知講書將畢修史垂成臣
子之心誰不欲久處朝廷長侍左右臣實以脾疾害

於飲食氣力羸劣今已彌年竊恐向去更難支持遂
成膏肓不愈之疾况門下省經筵實錄院皆不可以
療官曠職數在假告豈敢違安伏望 聖慈察臣至
情實非矯飾早賜俞允除臣一郡

貼黃如蒙矜允欲乞差臣知襄州一次

三四日

右臣近以疾病兩具奏乞京西一郡準尚書省劄子
奉 聖旨依前降指揮不允所乞者睿恩深厚天地
難踰非臣隕首所可上報輒瀝危懇重干天聽臣以
朴愚久侍經席嘗忝諫職進擢東臺曾無絲毫裨益

聖德素餐尸_祿緣為罪已多况復疾疢嬰纏心力減耗
大懼廢職而煩刑書伏望 陛下曲垂父母之慈不
違螻蟻之志特賜矜允除臣知襄州一次

乞解給事中狀九日

右臣近三上奏乞京西一郡準尚書省劄子奉 聖
旨依累降指揮不允所乞者仰瀆天聰每煩睿訓震
悸隕越無所自容臣雖疾病虔遵詔旨未敢更乞外
任輒有愚懇冒昧陳聞臣伏見 仁宗皇帝天聖四
年初讀唐書侍讀宋綬乞解勾當三班院以專講勸
章獻太后許之 神宗皇帝治平四年 仁祖實錄

將成提舉韓琦奏修撰王珪權免學士院諸雜文字
呂夏卿宋敏求亦免舍人院輪直專意筆削遂成大
典今臣菲才豈敢跂望前人而兼門下省講筵實錄
三職比之同輩過為僥倖加以久病心力俱耗實恐
隳廢職業以重罪戾伏望 聖慈矜察特解臣給事
中之任止令兼講筵實錄二職或乞依孫覺近例領
在京宮觀一處庶竭愚慮少裨聖學萬一仍得專精
史筆蚤成 先帝一朝大典臣不勝幸願

二十四日

右臣近奏乞解給事中之任止乞供講筵實錄二職

或乞領在京宮觀一處準尚書省劄子奉 聖旨令
臣權免簽書給事中文字候實錄書成日依舊者聖
恩隆厚曲賜優容天地大德未知所報臣以非才兼
領三職罄竭愚短非敢避事止以久病心力減耗雖
欲勉強實恐不逮是以冒昧陳情今蒙詔旨權免簽
書在臣之私則為僥倖然於事理深所未安伏緣今
兩省職事官與昔日知制誥之類職名不同臣豈可
居其官而不治其事受其祿而不任其責臣昨奏援
引王珪呂夏卿等故事蓋以前輩猶須專一乃得成
書臣以疾病止欲比附解罷一職宋綬但以進讀猶

許解三班院今講筵實錄於臣踈拙職事已不為少
伏望 聖慈特解臣給事中除一在京宮觀差遣臣
願畢力以供二職蝼蟻微誠乞賜矜察累瀆天聽實
非得已臣無任惶懼俟命激切屏營之至

辭禮部侍郎狀 六年九月二十二日

右臣準閣門告報已降告命特授臣試尚書禮部侍
郎者臣竊以春官亞卿省部清選必得博聞強識之
士達於禮樂制作之原乃可以稽古典常折中論議
居是職者古難其人伏念臣學術迂踈識慮卑淺誤
被簡拔寢服顯休擢處東臺徒更歲月雖彈薄力無

補萬分如^加以氣耗蚤衰體羸多病生慙尸祿深惧瘵
官唯襍被以俟行冀守麾之得請未從謹什尚荷兼
容敢謂眷知復加遷寵伏望 聖慈迴乾坤之施察
蝼蟻之誠特寢過恩俾安愚分改授臣一閒慢差遣
所有告命未敢祇受

謝禮部侍郎表

備員左省久塵夕拜之班賦政中臺進貳春官之長
避命弗獲居寵為憂臣竊以舜命九官秩宗典禮周
分六職帥屬佐王肅恭神人建保邦國欲稱茲任實
難其人伏念臣識智冥頑術業淺陋猥緣末學誤被

聖知入侍經帷况已更於六歲進參法從方僅及於
三秋徒懷愛日之誠曾乏適時之用報國已窮於薄
技竊祿實非其本心訖無橫草之勤矧有負薪之疾
宜絀居於散地乃升列於清曹此蓋伏遇 皇帝陛
下懋建大公緝熙庶政貴交修於近輔分小治於羣
司堯帝欽明咨百工之允理文王陟降思多士以圖
寧特收一介之微俾預六卿之亞仍加藩飾以示寵
光臣敢不夙夜惟寅服勞匪懈風雨如晦有隕不渝
庶効涓埃仰酬覆載

舉自代狀 十月三日

右臣伏觀左朝奉大夫直集賢院兼侍講吳安詩識
慮清遠學術淵源向在諫垣獻言體切入侍經席進
講詳明臣實不如今舉自代

謝講尚書徹就東宮賜燕表

古文畢講徒殫歲月之勤聖學又新益廣乾坤之業
式頒燕衍昭示惠慈竊以虞夏商周之書出於孔氏
之璧典謨訓誥之作備見聖人之心歷代之所寶藏
人主以為矩範載之行事能自得師恭惟 皇帝陛
下稟軒皇敦敏之資法堯舜欽明之德順稽古道遠
監前王日御西清躬勤典學九仞俄成於覆篲三年

遂見於通經優寵儒臣載加禮食肴核惟旅並秩於
周筵絲竹之音如聞於魯宅臣等幸陪勸講每愧空
餐適當肄業之終更被屬厭之賜

謝 太皇太后表

經幄侍言方訖帝王之大訓宸慈錫宴實為臣子之
至榮荷天度之包容叨特恩之寵厚恭惟 太皇太
后德凝坤載治協離明謹律度以誠身正端源而馭
俗申命博帶之士入講華林之庭竊觀聖德之日新
殆與古人而契合淵默臨朝則體虞舜無為之化恭
儉好禮則稽召公敬德之言庶績其凝九功惟叙固

將著見於實效非徒紬繹於多聞臣等妄陳口耳之
知魯之涓塵之補終篇甚幸示惠過隆金奏宣和聽
鈞天於夢寐皇華命侑滲漏湛露於蕭稂深惟稽古之
勤早及逢辰之幸致君有道當取於百篇報上無窮
更祈於萬壽

進 神宗皇帝實錄表

竊以書契之興以紀天下之事典謨之作乃見聖人
之功欲垂法於將來在屬辭於信史適當際會預備
討論恭惟 神宗皇帝爰自東宮暨升大位孝行同
於舜帝友道比於文王極典學之高明勤治功於旰

是乾健不息日照方中將追三代之風遽損百年之
壽惟規摹之宏遠有註記之浩繁 太皇太后陛下
保佑丕基布昭明德 皇帝陛下纂隆下武駿惠先
猷申詔儒臣裁成大典臣等誤被聖選愧非史才徒
廣記以備言實殫精而竭慮久淹歲月僅就簡編無
以發揮經緯之文髣髴緝熙之烈將陳旒宸若蹈水
淵其新修實錄二百卷事目十卷謹隨表上進

乞梓州表

元祐七年五月十八日

臣某言入侍經幄七改歲華違去鄉邦再終星紀輒
傾丹赤上去瀆高明伏念臣生本遐方才非大噐猥緣

末學獲近清光荷天度之兼容竭秋毫而無補誤膺
寵典寢寢歷顯途恭遇 陛下盛德日新多能天縱蘊

神明於默識集聖智於大成所宜旁求俊傑之才上
奉緝熙之學願臣淺陋何所發揮大明方中宜收燭
火無浸無際奚取細流况臣氣耗蚤衰體羸多病目
視昏近幾畫字而不成骨節支離殆勝衣而弗克精
力殫於簡冊夢寐役於松楸恐填壑之無時唯首正
之是念伏望 皇帝陛下迴乾坤之施察蝼蟻之誠
特假守於方州俾暫還於里社倘餘生之未泯庶九
死而可酌敢望 聖慈特除臣知梓州一次

乞梓州劄子 二十六日

臣近上表乞特除臣知梓州一次伏蒙 聖恩賜詔
不允仰煩謨訓丁寧誨諭震懼隕越無所自容臣子
之於君親義無隱情故不敢避再瀆之罪輒復冒陳^味
請臣以庸虛久侍經席積日累月已涉七年 陛下
天縱聖神日踰^躋睿智高明之度非可管窺臣之所學
竭盡無餘肺肝底裏皆可鑑照願臣淺陋中無所有
繁言複語無裨聖學 陛下方躬蹈堯舜壺奧日深
宜得儒學之宗道德之老延之西序執經於前敷陳
墳素發明聖蘊一辭開折^析百慮洗然乃可以益新輝

光奉承濬哲如臣之比實非其人加之疾病連年心
力耗廢若不自揆貪戀寵祿失之一發百發皆棄差
之毫釐千里為謬 陛下雖欲保全庇護亦不可得
伏望 聖慈以其久在左右特賜矜允則臣之餘生
今日以往皆 陛下之所賜也臣無任惶懼懇切之
至

二 六月七日

臣近上奏再乞知梓州一次準尚書省劄子奉 聖
旨依前降詔書不允所乞者天高地^聽卑未能感動再
三為瀆無所逃刑臣伏思元祐以來與臣同時勸講

之臣程頤以人言罷黜孫覺病廢死於揚州顏復司馬康皆死京師而臣抱疾累年日加羸劣形骸若此福祿可知故臣願及罪戾之未聞疾恙之未廢得郡而去一展先臣正墓庶幾死無遺恨若未先犬馬填溝壑則臣之報國猶有日也今儒學之英皆在左右宜更詳延俊德旁求岩穴博問遐觀益廣聰明如臣已陳之迹已試之效陛下所悉無補可見伏望聖慈察臣愚誠早賜俞允

辭免翰林學士第一狀二十日

右臣準閣門報已降告命除臣翰林學士者臣近三

奏乞知梓州未奉俞允方欲再露誠懇干瀆聖聽忽蒙遷授息出非常聞命震恐不知所措臣竊以學士近職侍從之首文章議論儒者所宗必得天下英材聲稱第一乃可以厭服人望為國光華臣以朴愚獲侍左右才力緜薄無所堪任使之解經述史粗能勉強至於文辭實非所工是以前不敢當書詔之職已蒙聽許今茲禁林尤為極選重以久嬰疾病形神俱耗豈可強顏秉筆貽朝廷羞在臣之義必難冒處伏望聖慈特垂天恩追寢成命檢會臣累奏特除知梓州一次

二十二日

右臣近上奏辭免翰林學士恩命乞差知梓州伏蒙
降詔書不允者睿恩隆厚聖訓丁寧在臣之愚何以
堪此臣不唯文學無以過人前已辭書詔之職近又
累乞鄉郡義雖難祇受兼於國朝故事有不可者伏
緣臣叔百祿見任中書侍郎臣竊見仁宗時翰林
學士王洙以兄子堯臣參知政事避親改侍講學士
昨蘇軾除學士承旨亦以弟轍執政懇請出知潁州
今中書政本樞機之地無不統攝臣若就職理實有
嫌伏望聖慈許臣依王洙蘇軾近例避免臣未敢
更乞川蜀遠州欲乞除臣京西一郡自效誓畢餘生
以圖報稱

三二十八日

右臣近兩奏辭免翰林學士恩命準尚書省劄子奉
聖旨依前降詔書指揮不許辭避者稽違詔命知有
常刑然臣子之情不敢不竭盡於君父臣竊以避親
故事簡策具存方陛下懋建大公以先天下而臣
豈敢貪冒榮寵晏然自居雖無人言豈不內疚此臣
所以不避誅責至於必辭也伏望聖慈察臣肺肝
實非矯飾追還新命特除臣京西一郡誓殫犬馬之

力圖報天地之恩所有告命不敢祇受

四 七月七日

右臣近三奏辭免翰林學士恩命乞京西一郡準尚書省劄子奉 聖旨依累降指揮不許辭避者瀆煩天聽非止再三罪不容誅義非得已臣竊以侍從清切莫如禁林儒者之榮孰不願此况臣一門自叔祖臣鎮叔父臣百祿前後相望今臣復蒙遷授是為三世迭居此職臣雖至愚豈不思上奉聖神之眷知下為門戶之光罷力欲祈免殆非人情然臣所以不避誅責必辭不已者伏以朝廷有避親之法實關盛衰

蓋將垂永世之規非特為一人之計遠則 仁祖之世故事甚明近則 神考之時韓維亦避兄絳出守藩郡今 陛下訓迪在位未嘗不以至公然則 祖宗故常君臣所宜共守臣豈可覲顏居職隳廢舊章天下之人莫不戶曉竊恐上累朝廷無私之舉而於臣有貪得幸位之譏此臣之所不敢處也伏望 聖慈矜察特賜收還告命除臣京西一郡他日任使臣不敢^辭報國之心死而後已

太史范公文集卷第六

表狀劄子

笏記附

辭免翰林侍講學士狀 十七日

右臣準閣門報已降告敕除臣翰林侍講學士兼修國史者聞命震恐無所容措臣竊以侍講學士之職始於真宗所以延登耆儒專尚經術自神考更定班制止以侍從兼官元豐以來久虛學士之選恭惟先帝神功聖德在太史金匱石室之藏今將繼五朝之書成一代之典考之故事多委輔臣伏念臣以樸學侍經惟以薄才居史觀徒積歲月訖無勞能

間引親嫌懇辭禁職願從外補少養沉痾乃蒙假以
寵名付之事任大惧無以報塞唯速悔尤方今獻臣
宗工在位服采必有傑俊可當選掄伏望 聖慈改
授賢才庶協公議所有告敕不敢祇受

謝翰林侍講學士表 七月

臣某言伏蒙 聖恩以臣辭避翰林學士恩命特授
翰林侍講學士兼修國史尋具陳免伏奉詔書不允
者辭其可辭敢忘故事受其可受祇服新恩謝中洪惟
真宗初置講職問學常勤於日昃論經或至於夜分
以啓迪於後人俾監觀於成憲 先帝更新治職止

命兼官雖因革之制不同而經緯之文則一惟熙寧
元豐之成烈有金匱石室之舊聞丕顯帝謨尚資史
筆追觀 列聖之典多委四輔之臣夫何一介之微
膺此二任之重此蓋伏遇 皇帝陛下欽明文思齊
聖廣淵如日方中法天不息謂二帝三王之道當窮
極於高深 一祖四宗之書已光昭於永久惟念終
於典學聿追孝於前文以臣夙侍書筵叨塵史觀曲
加寵教用示眷留昔魯穆公之於子思亟饋鼎肉燕
昭王之於郭隗改築金臺二子者或以無人乎側而
不能安或欲致士於遠而先為始如臣陋學敢望古

人非懷人爵之可榮竊喜聖心之不倦
謝 太皇太后表
三請鄉邦莫遂告歸之懇四辭禁職獲伸引避之文
成命曲迴明綸載降省循非稱震悖交深臣竊以在
昔文武之興本由任姒之聖繩其祖武詒厥孫謀教
誨之勤詩書所述恭惟睿德光越前聞大公如天地
之無私至明如日月之必照保佑元聖躋登泰寧思
出入起居罔不欽故左右前後惟其正篤先朝之
成烈有太史之陳編申敕司存俾加論次如臣淺陋
曷副選掄此蓋伏遇 太皇太后陛下丕冒羣生答

揚 列聖以正君心為定天下之本以守國典為固
後嗣之基惟迪前人之光以成昭子之法兼收末學
俾贊大猷重念臣病骨支離壯心消落周南一紀已
期終老於岩林書殿七年竊覲歸榮於桑梓分安閒
散乃寘高華臣敢不勉企前修益堅晚節庶圖薄效
仰答至仁

笏記

臣伏蒙 聖恩特授翰林侍講學士兼修國史者侍
言經幄特升嚴近之班汗簡史闡俾綴緝熙之典此
蓋伏遇 皇帝陛下道法堯舜孝承 祖宗永言若

昔之猷仰對在天之烈夫何重任猥屬非才當勉竭
於衰疲庶少酌於造化

執秩經帷奉邇英之典學紬書史觀揚神考之烈

光頌臣何人獲預茲選此蓋伏遇太皇太后陛下

坤元至正天造無私積思六經日進聖神之德垂鴻

千歲眷言簡冊之文永宥報國之忠益勵致身之節

謝賜對衣金帶鞍馬表

臣某言伏蒙聖慈特賜衣一對金腰帶一條金鍍

銀鞍一副馬一匹者錫六命之章仰勤司服加三接

之禮進視康侯循已無加堪在顏有覲伏念臣布韋筮

仕徒步入官經術空踈謝栢榮之稽古史才淺陋慙

倚相之讀書驟升清要切之班復被便蕃之澤犧尊所

棄飾以青黃芻狗已陳加之文繡此蓋伏遇皇帝

陛下籲俊尊帝養賢及民藩飾羣臣寵綏四海德必

稱服愧無君子之容負以乘車當戒小人之寇

謝太皇太后表

華林勸講益親咫尺之威文陛對揚更被龍光之渥

省躬非稱拜手若驚伏念臣寬褐一夫疲駑十駕衣

緼袍而不耻每欲書紳馭款段以言歸敢斬乘駟豈

意草茅之質併蒙車服之華此蓋伏遇 太皇太后
陛下章物采以納民重爵祿以勸士既錫之福又昭
其文同緇衣之好賢授之館餐異白駒之食藿加以
繫維誓竭忠勤仰酌春禮

進 神宗皇帝御筆文字表 六年十月四日

臣某等言先奉 聖旨編修 神宗皇帝御筆文字
今已了畢者出而為詔見王者之深心言則成文表
聖人之能事著為軌範屬在繼承恭惟 神宗皇帝
天縱聖文神資睿斷體虞夏之 舜 大智躬夏禹之克勤
經緯萬機焦勞百慮自朝至晷而不遑暇食味爽待

旦以啓迪後人號令惟行若風雷之鼓舞指麾所定
如日月之照臨惟門下省審之司實王命出納之地
欽承聖畫洞察物情暮訓具存真游已遠恭惟 太
皇太后陛下 皇帝陛下並明御極濬哲在躬適追
燕翼之謀仰對丕承之烈將觀成式以起治功申敕
司存俾加紬次編之簡冊用資乙夜之觀列於圖書
永為大訓之寶臣等謬居職業幸預討論迄奏成篇
愧無薄效其御筆十卷目錄一卷計十一冊謹具進
呈

辭賜茶合狀 八年二月十日

右臣伏蒙 聖慈以臣進 神宗皇帝御批真筆特
降中使賜臣茶一銀合者伏緣三省同進 先帝宸
筆臣以門下後省舊職亦預上殿所進止是七件在
臣殊無絲髮之勞今茲隨例受賜實慙面目伏望
聖慈許臣回納庶安分守則臣蒙被 睿恩過於拜
賜多矣

二十六日

右臣近奏乞回納賜到茶一銀合準尚書省劄子奉
聖旨不許辭免者臣前後受賜未嘗敢辭今所進
神宗皇帝真筆不唯文字至少與中書尚書省不同

兼臣實無微勞是以不敢避煩瀆之罪伏望 聖慈
除本省主行吏人支賜外特降指揮許臣回納

辭免翰林學士兼侍講學士狀 四月二日

右臣準閣門報已降告命特授臣翰林學士兼侍講
學士知制誥者臣以朴學久侍經帷前蒙誤恩擢處
禁職既以親嫌引避天造曲成特修廢官俾專講勸
先帝大典付之論撰兼此二任懼不克堪而曾未期
歲復承人之頽慚淺陋每簡聖明重念臣蚤衰多病
心力減耗使之執經述史尚可勉強至於辭翰實非
所工誠不足以塵污玉堂之禁重兼金華之職矧今

儒學之英布列中外可備此選不無其人伏望 皇
帝陛下察臣懇誠特迴睿聽追還成命俾安舊職亦
所以全覆其短不違所長庶殫薄力少圖報效所有
告命未敢祇受

二六日

右臣近具奏辭免翰林學士兼侍講學士恩命伏蒙
降詔書不允者仰煩睿旨訓諭丁寧內省庸虛伏深
震畏輒瀝愚懇再瀆天聽臣伏見 仁宗之初孫奭
為侍講學士凡七年乃兼龍圖閣學士又三年以本
職出知兗州馮京避親除侍讀學士後為翰林學士

不兼侍讀 神宗之初司馬光呂公著皆以翰林學
士兼侍講初不兼學士之職臣叔祖鎮事 仁宗
英宗再入翰林治平中以侍讀學士出知陳州 神
宗召還復為翰林學士亦止兼侍讀不帶學士臣於
去歲蒙除禁職 聖恩許避親嫌改授侍講學士今
蒙復申前命遂兼舊職是臣因避親嫌不一期歲得
兩學士在臣之分夫豈敢安朝廷如不許臣辭免新
命又以臣久在經筵仍令兼職即乞依舊例止兼侍
講不帶學士則於職事無改而不違典故少安分守
庶免罪戾貪冒天寵臣無任慙懼激切屏營之至

謝宣召入院表

右臣今日翰林待詔秦訓至臣所居奉 聖旨召
臣入院充學士者使節命光華誤被以旌之召臣衣顛
倒豈容俟駕之行閭里生榮播紳動色臣竊以謀猷
入告於內是論謂思號令罔有不臧實繫文翰自唐
世始命名此職及 聖朝尤慎擇其人宜得宗工進
為治表如臣者學雖為己才不逮人蚤塵儒館之遊
久備書筵之訪徒勤夙夜無補涓埃五歲乞骸固已
慙於疏廣九年歸道何敢望於栢榮間引親嫌復辭
禁職復膺前命殊匪初心此蓋伏遇 皇帝陛下天

縱聖神日躋睿智德剛健而篤實學緝熙於光明登
進衆賢兼收一介俾陳薄力以助鴻猷臣敢不策勵
疲駑激昂忠義苟可益國其敢愛身

謝 太皇太后表

王人將命天詔頒恩望宸極以拜嘉即私庭而示寵
省循非稱偃僂若驚臣竊以正王者之心慎在左右
鼓天下之動係乎文辭惟茲翰墨之林實首論思之
地仰膺異選宜得偉人如臣者經術不明藝文無取
金華勸講獲親親日月之光石室紬書俾述乾坤之業
魯蔑聞於績效乃采入於禁嚴此蓋伏遇 太皇太

右陛下洪覆無私大明旁燭急堯舜之先務哲在知
人躬任似之思齊寧多士况臣一門叔姪三世後先
起下國之孤生受累朝之殊遇負荷豈勝於山嶽
糜捐何啻於毫毛臣敢不彌激懦衷益堅素守誓不
渝於終始庶少答於生成

笏記

臣蒙恩特授翰林學士知制誥者數言經幄無裨
典學之勤視草詞林實玷右文之選避命弗獲居寵
惟憂此蓋皇帝陛下慮憲祖宗面稽堯舜克艱
厥后無競惟人思廣攬於羣才故曲收於末學唯當

盡瘁以答殊私

又

西學侍經無入神之精義北門掌誥非華國之懿文
祇荷寵靈交深愧汗此蓋太皇太后陛下照臨區
寓擁佑聖神官不及私人惟求舊無管蒯之或棄同
茅茹以並升冀竭微誠仰酬洪造

謝賜對衣金帶鞍馬表

臣伏蒙聖慈以臣入院特賜衣一對金腰帶一條
并魚袋金鍍銀鞍轡馬一匹者司服頒衣以儀辨等
飛龍出駿凡賞眡功頌惟何人亦預此賜伏念臣文

采不足以自表學問不足以有行軒冕之來實惟絕
意文繡之美不願施身已叨儒者之極榮復備邇臣
之異數此盖伏遇 皇帝陛下慎司名器訓迪臣工
以為都士之容宜有常而不貳君子之乘欲既閑而
且馳故於侍從之聯特加蕃庶之錫書紳自儆惟敬
慎於威儀希驥為心當載加於鞭策

謝 太皇太后表

使軺趨召入居文翰之司宸宸對揚荐被龍光之渥
省躬非稱拜手若驚伏念臣短淺凡材顛愚朴學謬
塵法從誤簡聖知驟膺識拔之私復荷便蕃之錫此

盖伏遇 太皇太后陛下坤元廣載允澤旁流道在
寶慈人無易物重金飾帶特頒上楮之珍錯綵成鞵
仍輟內閑之駿仰愧崇賢之禮難逃致寇之譏惟勉
勵於疲駕庶少酌於覆露

舉自代狀 十八日

右臣蒙 恩授前件職合舉官自代伏覩國史編修
官著作即集賢校理國史院檢討張耒文章瑰瑋論
議閎博必能發揮典誥為國光華臣實不如今舉自
代

謝勅設表 二十四日

享有加籩雖循故事與之禮食以示優恩惠決賓筵
榮生官次伏念臣挈筭小智挾筴陋儒蓬葦桑樞進
處玉堂之禁藜藿糲食驟加雕俎之珍於臣無饋肉
亟拜之勤而人有既醉太平之行此蓋伏遇 皇帝
陛下重祿勸士大烹養賢稽虞書橐飫之文從周家
忠厚之禮食啣鹿於苹野俾得盡心觴鷄鵠於魯門
愧非所養唯當夙夜圖報恩私

乞郡劄子一

九年三月二十五日

臣輒瀝誠懇仰干睿聽退省僭瀆無所逃罪臣自熙
寧之初受詔修書 先帝末年擢寘儒館 陛下嗣

位寢加簡拔經筵史觀併兼二任遂塵禁近竭力無
補而不離文字之職二十五年兩目昏闇幾於失明
蚤衰多病心力損耗自元祐五年任給事中日乞知
襄州一次六年七年又累乞知梓州一任皆不蒙開
可臣實何人誤被眷知固常盡死以圖報稱而臣目
疾愈甚衰病日加實懼精力不逮竊官廢職雖填溝
壑無以塞責重念臣自入仕以來未嘗歷官州郡今
筋力疲憊未敢遠乞近鄉差遣伏望 聖慈特除臣
京西一郡俾之展力自效因得休養羸病倘未即死
則臣之報國猶有日也伏祈天恩特賜矜允臣無任

惶懼激切之至

臣昨日因上殿面陳至懇伏蒙 聖諭不須入文字
臣受 陛下殊常之知雖隕身喪元未足為報固當
虔遵詔旨靖共職事然臣竊伏自念入侍經席于今
九年自元祐以來侍從之臣得在 陛下左右無如
臣之久者豈可貪冒天寵處之晏然夙夕徬徨不能
自己是敢干犯嚴憲剖列私誠伏望 聖慈終賜保
全特除臣外任一次臣無任恐懼俟命之至

三四月五日

臣近上奏乞除京西一郡伏蒙

聖慈特降詔書不

允捧讀震懼無地自容輒復傾竭愚懇干瀆天聽臣

伏見 仁宗乾興之初孫奭入侍經筵至天聖九年

出知兗州 祖宗之時侍從出入蓋示優容非以在

外為疎也今 陛下聖哲天縱輝光日新而臣至愚

無與經術自初入侍今九年矣羸榮多病心神衰耗

目視昏闇日甚一日是以不勝螻蟻之誠微幸大恩

特許外任俾效薄力因得少遂休養庶幾所疾不至

沉痾未即填委溝壑猶當麋_麋軀隕首仰酬天地之造

伏望 陛下曲迴睿聽早降俞旨臣無任懇切俟命

之至

四九日

臣近兩具奏乞外任準尚書省劄子奉 聖旨依前降詔書不允者再三為瀆罪不容誅仰恃寬仁亮其誠實伏念臣先於元祐五年八月兩具奏乞京西一郡又奏乞知襄州一次六年三月兩奏乞知梓州一次七年五月六月四奏乞知梓州三奏乞京西一郡然則懇請補外乃臣素心非始於今日也伏望 聖慈察臣蝼蟻之誠憫臣犬馬之疾累煩宸聽為罪已多曲垂天恩早賜俞允除臣京西一郡臣無任惶惧

激切俟命之至

謝除龍圖閣學士知陝州表

紹聖元年四月

北扉入直已竊玷於華塗內閣延登復謬塵於近列付以民社處之蕃維祇荷寵私伏增震惧伏念臣受材讓薄逢世休明學不足以造微文莫能於行遠徒以久陪勸講誤被眷知訖無橫草之勞素有負薪之疾剡草屢上請郡以行詞禁嚴凝獲解論思之職河圖秘邃猶叨侍從之班仰惟天地之仁難圖蝼蟻之報此蓋伏遇 皇帝陛下欽明稽古睿智如神迴日月之光幽深必照廓山海之度細大兼容憫篤力之

已疲施洪恩而下濟臣敢不激昂晚節砥礪初心益
誓糜捐仰酬覆育

謝對衣金帶鞍馬表

伏蒙 聖慈特賜臣衣一對金腰帶一條金鍍銀鞍
一副馬一匹者延閣升華搢紳以為榮遇明廷拜賜
車服加於罔功伏念臣寬褐陋儒衡門賤士仰際亨
嘉之會獲親咫尺之威累塵侍從之班重被便蕃之
澤此蓋伏遇 皇帝陛下寵綏四海藩飾羣臣爵賞
所以勸能恩禮欲其稱事臣敢不省身知愧彌堅報
上之忠執策忘勞益勵首公之節

笏記

臣伏蒙 聖恩特授臣龍圖閣學士知陝州軍州事
者伏念臣蚤緣_樸學久侍清光誤被聖知累塵法從
獲避北門之直復躋內閣之班此蓋 皇帝陛下大
德兼容至明委照察丹衷之有素垂洪造以曲成誓
竭疲駑仰圖報稱

陝州謝到任表

伏奉告命差臣知陝州軍州事於今月二十六日到
任上訖對揚宸宇方違遠於清光分職藩維已布宣
於寬詔伏念臣蚤緣末學誤被眷知經幄九年無發

明於古訓史闡十載獲紀述於神功非堯舜不言竊
慕責難之義惟祖宗是憲仰禋求助之明日月之
光螢爝何補乾坤之德繪畫難工迫衰疾之交侵瀝
懇誠而屢瀆獲解近嚴之職猶塵侍從之班惟陝服
之舊邦有召公之餘化西當蜀道東邇洛郊稍即便
安良為優幸此蓋伏遇皇帝陛下欽文稽古濬哲
在躬育德新其輝光典學念於終始謂臣久脩頽問
每傾竭於肺肝深簡睿明實照知其悃幅曲從所欲
用示至仁臣敢不上辭宸慈俯求民瘼庶有承宣之
效少寬宵旰之憂

國史院取索實錄草沓奏狀

六月二十三日

今日二十三日準尚書省劄子檢會提舉修實錄

呂大防劄子奏臣昨奉勅提舉修撰神宗皇

帝實錄今已成書竊聞舊例所修實錄草沓史官

各收一本照證今來本院所修實錄草沓合依舊

例又緣別無公案見得欲望聖慈特許依例除

定本外將見在草沓各分一本與見在提舉修撰

官以脩照證外餘依前降指揮焚毀取進止黃貼

子稱如蒙賜允委不傳寫漏泄元祐六年十月十

二日奉聖旨依奏六月十八日三省同奉聖

旨令范祖禹將所得草沓限當日如法封角差得力人管押遞鋪轉送赴修國史院送納如有傳寫到別本亦同封角送納或轉寫與他人即令自陳如輒隱留當重行貶責者

右臣尋依準尚書省劄子內 聖旨指揮將所得草沓并事目共二百一十沓並於當日如法封角共計五籠差職員十將各一人管押遞鋪轉送赴修國史院送納去訖外即無傳寫到別本及不曾傳寫與他人委是詣實謹錄奏聞

并申尚書省照會及申國史院乞依數交割訖公文回示

貼黃草沓外有官簿五冊係是院例檢閱實錄

錄文字亦同分到不敢隱留今并送納合具奏

知 狀 開封府界居住報應院國史院取會文字

今月二十七日準尚書省劄子龍圖閣學士左朝奉大夫范祖禹已降 勅命差提舉亳州明道宮左朝奉即克集賢校理黃庭堅已降 勅命差管勾亳州明道宮六月十八日三省同奉 聖旨各於開封府界居住就近報應國史院取會文字

右臣尋依準前項 聖旨指揮已交割本州公事與

通判管勾訖見赴發前去開封府界居住聽候指揮
報應國史院文字次謹錄奏聞

永州謝表 二年三月

臣某言臣於正月五日準告責授武安軍節度副使
永州安置尋於七日起離開封府界於今月二十五
日至永州公參訖者罪惡盈積重於丘山仁聖寬容
厚侔天地伏讀訓戒感極涕零伏念臣鄙野陋儒荒
唐末學徃承人之進脩官聯紬太史金匱石室之書
紀先帝成功盛德之事才不稱職罪豈容誅無以
仰述對天之休共成垂世之典實由愚闇自速顛隳

宜正典刑難逃顯戮尚蒙全貸投畀幽遐此蓋伏遇
皇帝陛下法唐堯之至仁體虞舜之大智以好生為
德故刑罰必主於輕以不忍為心故昆虫亦保其命
特屈士師之議不加蕭斧之誅禹下車而泣辜湯開
網而祝獸重念臣稟生素弱賦命多竒疾病有年死
亡無日今茲越洞庭重湖之國鄰桂嶺炎瘴之鄉形
魄雖存喘息殆盡敢不剝心念咎刻骨銜息蝼蟻至
微誓答乾坤之施犬馬雖斃永懷帷蓋之仁

賀州謝表 三年十月

臣某言臣先蒙責授武安軍節度副使永州安置準

告責授昭州別駕賀州安置臣已謝恩祇受即起發
赴貶所於十月十七日到賀州公參訖者竄投湘浦
痛省咎愆流放炎荒尚寃誅殛仰荷全貸伏切涕零
伏念臣賦性至愚受恩過溢頃居近職嘗有瞽言不
慎發於樞機宜即刑於鈇鉞聖心惻隱訖至累年天
造涵容難遏公論由臣迷罔失道狂惑妄行自災厥
身以陷大戾百生何補萬死猶輕伏遇 皇帝陛下
天地施生日月臨照躬蹈堯舜心存禹湯推文王葬
骨之仁軫仲尼埋犬之惠雖當殄戮猶或哀矜賜以
餘生屏之裔土已投身於魑魅之域將淪骨於瘴癘
之鄉倘及泉而有知猶結草以圖報

太史范公文集卷第六



太史范公文集卷第七

表

代王君貺宣徽北京謝上表

偃藩全魏掌籥留都選拔所艱寄付尤重謝伏念臣
識非慮遠才不兼人被遇三朝歷年四紀竊隆名
於徽省視峻秩於台司往歲詔自西都日朝法展宣
聖猷而何補尸厚祿以空慙輒貢需章懇祈閒職寬
息從欲蕃錫示慈特置使於祠庭俾即安於私館間
者祇奉召節入對邇顏幸陪宗祀之儀復預駿奔之
列天光委照宸眷曲臨特頒渙汗之恩復假北門之

守越從散地併總劇權此蓋伏遇 皇帝陛下盛德
日新至仁天覆責實群后分治九圍眷朔土之奧區
為浚都之巨屏大河期控重兵所屯常輟元老之臣
俾居連帥之職夫何圖舊猥及匪能重念臣久齒近
班三領茲任撫綏之要鎮守之宜雖素乏於智謀嘗
粗經於心目敢不益堅晚節彌激懦衷勉企前修仰
酬洪造

謝

勅書獎諭賜銀絹表

以下代司馬温

臣某言伏蒙 聖慈以臣編修公卿百官年表成書
降 勅書獎諭仍賜銀一百兩絹一百疋者奏篇甫

上褒詔爰頒荷寵若驚省躬無措中伏念臣淺才末

學苦節孤忠久塵侍徒從之班魯乏猷為之補頃膺睿

旨俾纂舊章恭惟 祖宗創業垂統之難邦國立政

任官之要必表年而紀月可鑒古以驗今略舉宏綱

庶存成式淹留累歲紬次終篇仰稽乙夜之觀方虞

曠職之咎敢期温詔發自淵衷錫外府之貢金加正

園之賁帛載惟虛受采切覲顏此蓋伏遇 皇帝陛

下順考百王丕承列聖德剛健而篤實學緝熙於光

明眷執簡之微勤形贊書之重獎寵踰華袞既稽首

以嘉拜賜厚百朋實無功而冒賞

謝再任崇福宮表

曩奏上陳實為貪祿黷聰垂聽亟沐頒恩仰荷寬優
伏增兢悸伏念臣器非適用學不知方被遇三朝
叨塵二禁辱天光之顧問侍經席之從容亦嘗委總
憲司訖無報稱擢陪樞府終獲懇辭剖竹雍都葭聞
於治效分臺洛邑幸養於沉痾仍再領於祠庭遂十
更於歲籥頃自受命先帝俾刊舊聞迨陛下之
續圖發德音而繼志而臣勞勩在外奏篇未終蓋簡
冊之浩繁致歲時之淹久雖官守無事慙四體之不
勤而史筆專精實寸陰之是惜惧先溝壑以負恩知

久去班行顧其他而無補坐糜祿廩常自訟而靡遑
尚或無厭曾不知耻輒披私懇輕冒宸嚴豈敢謂皇
帝陛下大德包荒至明燭遠罔責再三之瀆曲垂開
可之私蓋特出於異恩故不拘於畫法乾坤至大雖
萬物皆遠遂其生雨露所私或一夫獨被其澤惟願愚
之無狀容僥倖以滋多臣敢不深戒宴安祇勤夙夜
畢精撰述圖報生成

慰山陵禮畢表

臣某言伏覩今月十日慈聖光獻太皇太后山陵
禮畢者溥天同軌有嚴聖后之喪卜壤因山備盡

孝孫之志寢宮長掩廟祏維新臣某誠哀誠懼頓首
頓首恭惟 皇帝陛下行過高宗念深 文母極奉
終之大事懷追遠之至哀瞻容衛以如存痛音徽之
不返原陵永固與天地以無窮祀享深思惟春秋之
匪懈伏望順禮之變卒哭以時加養體之膳羞護如
神之志氣上承宗廟下庇羣生凡在臣民不勝懇願
臣屬居官次阻覲闕庭瞻望宸極臣無任悲隕激切
之至

謝四任崇福宮表

自天有命如地兼容祇荷寵私伏增汗愧謝伏念臣

性非語上學昧造微仰會聖朝謬塵侍從久去近嚴
之列曠修臣隸之勤荐領祠宮坐貪天祿而年齡逾
邁齒髮益衰疾疢交攻形神日耗唯職思於簡冊庶
上助於謀猷敢期復霈厚恩俯從私欲此蓋伏遇
皇帝陛下大明委照罔間幽遐洪造曲成不遺品物
收簪履而未棄憫蒲柳之先凋特加異於常倫俾養
疴於散秩頽勤勞之靡效曷報丘山異撰述之有成
少裨毫髮

辭免轉正議大夫表

中天霈澤近輔書勞亦及罔功豈容私受伏念臣素

無他技唯罄孤忠誤蒙 累聖之知寢服近僚之列
終因人乏進貳宰司 先帝審訓羣臣靡預誓言之
末 陛下嗣膺大寶曾無翊戴之勤豈弗畏於多言
詎敢當於懋寵矧乃方任人而立政惟即命以記功
將深戒於官和宜先從於近始伏望 皇帝陛下慎
司名器申勸臣鄰收出綽之過恩亮循墻之愚懇爵
惟馭貴免上累於至公賞必及勞庶率由於舊典

上 太皇太后表

仁惟圖舊賞異及勞義所辭當情難冒處伏念臣早
緣末學被遇 累朝之稽古之令猷無致君之遠業

入陪經幄久親日月之光出領祠宮實荷雲天之施
會 慈宸之御極登 嗣聖以承祧誤膺之使之求
擢預贊襄之列屬寵褒於近弼特序進於文階願無
橫草之勤均被出綸之渥輿情共駭內訟靡遑伏望
太皇太后陛下洪造聽卑至明燭隱慎守馭臣之柄
無輕出器之名昭示大公輟已行之成命少安愚分
息被已之深譏

謝表

離明繼照允澤旁流祇受以還震惶無措臣聞以賢
詔爵則民興民行 誼眠功為賞則下絕覬覦故德盛者

其位隆力勤者其報厚勸沮斯在授受靡虛伏念臣
學不適時才非經世謬塵近列最後諸臣尊體貌之
兼隆竭股肱而無補屬舉懋官之典咸疇衛上之勞
績用茂聞褒章誤及雖危衷之備列終成命之莫迴
居寵無名在顏有覲此蓋伏遇 皇帝陛下馭臣惟
禮厚下以仁優其進等之恩責以致身之節乾坤至
大均覆載以不遺日月無私委照臨而盡及永圖報
塞唯誓糜捐

謝 太皇太后表

明綸誤及渙汗難收弗獲懇辭終慙冒處伏念臣自

陪機政無補聖猷雖夙夜以自強惟事功之匪立每
流年之是惜加衰疾之所嬰敢以瘵官復當懋賞是
以歷陳故實備述悃誠荐奉詔音兩紆使節對天威
之咫尺煩睿訓之丁寧循走無從強顏祇受此蓋伏
遇 太皇太后陛下至仁勤施大德兼容推均一於
鴈鳩昭忠厚於行葦體乾坤之覆育品物不遺並日
月以照臨光明下濟誓殫駑力仰答洪私

謝起居減拜表

伏準閣門告報今月十四日內降以臣與呂公著近
各推恩轉官所有將來正謝特令兩拜起居餘免舞

蹈仍於執政官班次後別作一班及自今後凡遇前
後殿應于大起居特令別作一班止兩拜起居恩出
非常禮加異數優假太過慙負愈深謝中臣猥以瑣才
預聞機政去春以後疾疹屢生入冬以來飲食漸少
迨茲歲序之首頓覺筋力之衰拜起絕艱朝請殆廢
內惟息紀之重天地所不能踰退思績效之微絲毫
未嘗有立欲避位則為罪益大欲就列則強力不前
朝夕為衆目所觀啓處無措躬之地敢謂 太皇太
后陛下仁霑枯朽明燭幽微特虧著定之儀曲遂形
骸之便臣詢諸故老或謂有舊章然彼皆位躋宰輔

之崇德著者明之美豈臣么麼所敢比方欲辭則實
所不支欲受則自知非分踧踖心悸戰兢汗流惟仰
賴於寵靈真有瘳於藥物病庶遒已禮得如初期於
竭忠不敢愛死

辭免除右僕射表

非常之寵丕降於中天不次之恩驟加於庸品承命
震駭顧已覲慙伏念臣起自諸生初無遠業學不足
以迪先民之覺才不足以撥揆當世之宜徒以被遇
累朝服勤庶職荷生成於天地無裨補於涓埃惟知
直道之可行勉罄孤忠而自守仰屬繼明之始首膺

訪落之求拔自散僚進陪機政苟可利國知無不為
期於致身死而後已此嬰衰病累貢危誠祈解組以
即安庶負薪之可愈忽奉告庭之命併叨躡等之榮
越從三事之中擢冠百僚之上力小任重居寵思危
義所當辭情難冒處伏望 皇帝陛下達聰垂聽劾
忠任能灼知三俊之心深慮萬機之委慎名器而不
假念后臣之克艱俾逃竊位之譏獲遂循墻之請

上 太皇太后表

誕告外庭眷求同德延登上宰猥屬匪能承命兢惶
無所容措臣聞宰相者所以代天理物論道經邦上

和陰陽下遂動植權衡賞罰藻鑒賢愚大厦棟樑豈
容於橈弱巨川舟楫將濟於艱危苟非得人則必誤
國臣早塵顯仕晚玷近司受恩不貲竭力無補加以
疾雖損而未已老將至而益衰將何以率萬邦黎獻
之多居三事大夫之首內撫百姓外鎮四夷非薄力
之所堪懼瘝官之有咎義當引避情敢冒居矧今俊
乂孔多耆碩咸在必有良弼仰當聖心伏望 太皇
太后陛下考慎其人登庸於位俾熙帝載以亮天功
如臣之愚恐不克稱乞迴明命以示至公

第二表

囊奏上陳誠辭既竭綸言申答謨訓未俞臣竊惟自古睿聖之興皇天所佑必有碩輔為時挺生同德協心建功立事故有堯舜之后乃有稷契之臣有成康之君乃有周召之佐用能盛烈格于上下鴻名冠乎古今方冊所稱軌躅可見陛下大明出震至德承祧始在亮陰動循禮法既親典學日就緝熙實惟億世無疆之休兆民咸賴之慶宜得先覺之士老成之人左右有民承弼厥辟同底于道永孚于休如臣之愚曷副茲選而况弗循位序夙越等夷非拙分之所安亦多言之可畏靡遑夙夜如踏冰淵伏望皇帝

陛下洪造曲成至仁廣施聽輟已行之命免貽非據之災詎敢飾辭恭祈報可

上太皇太后表

命出非常義無虛受仰勤睿旨未奉俞音臣伏以在昔仁皇纂圖明肅聽政英祖嗣服慈聖臨朝皆有宗工之臣一德之相誕保皇家之定命發揚文母之徽音是以左右前後罔非正良號令風采咸可稱述克有成烈底於太平民到_於今並受其福陛下齊任姒之聖保成康之君坤德靜而直方母教仁而慈愛端拱宸極丕冒海隅敷求哲人式序在位

宜得碩輔翼宣大猷臣本非長才久乏遠識誤膺器
使進貳宰司不以德功超居鼎鉉將何以對揚休命
追配前人安海內於覆盂尊京師而奠枕茲任尤重
非臣所堪伏望 太皇太后陛下深軫睿慈亟迴成
命庶少安於過分免上累於知人

謝表

君勞求賢實出過聽聖識論相非容懇辭拜命以還
覲顏無措伏念臣受才至薄造道匪深無所有以及
人唯自信而行已逮事 仁祖被遇 英皇膺前席
之眷知奉邇顏之顧問當熙寧之初政近 神考之

清光唯知至誠可事明主異以直道少裨聖時 先
帝察知不欺聽順所守恩厚侔於天地禮待優於臣
鄰思隕首以無從痛上賓之已遠 陛下大明繼照
庶政惟新祇邇先猷眷求舊物越從散地擢寘近司
尸厚祿以空慙罄拙謀而無補屬嬰病苦久賜告休
宜從策免之科乃奉庭揚之命延登揆路進脩冢司
顧非經世之才實玷代天之任日有萬微之慎慮身
無數器之兼能辭不獲從居之益惧此蓋伏遇 皇
帝陛下虔膺駿命誕受丕基永惟立政之艱思致生
民之義謂職業粹於羣下故加體貌之隆治亂在於

庶官必自股肱之助方恭默以思道將垂拱而責成
乃俾瑣才遽當重位臣敢不上體至眷愈堅一心不
遺力於餘生庶少酬於鴻造

謝 太皇太后表

戒命已行難收渙汗力辭如偽終負覲顏祇受以還
震惶無措臣竊以經綸天下之務必得名世之才斟
酌元氣之和實惟宰物之任德稱其位古艱其人矧
當宵旰之勤協濟艱難之治伏念臣早緣末學歷事
累朝徒罄愚忠無裨至化荷天地生成之德蒙山海
包納之仁知其一介之無他惟有寸誠而可錄 陛

下睿明臨照旁及幽遐聖政始初眷求耆艾擢居左
省參翊大猷豈聞歲計之有餘未覩時雍之於變卧
家嬰疾曠日瘵官猶圖報於君親已分填於溝壑遽
奉告庭之套命併加躡等之恩承乏宰司秉均揆路越
處百僚之上榮升三吏之崇夫何迂拙之人驟被燮
和之寄此蓋伏遇 太皇太后陛下布昭明德保佑
丕基思濟羣生永綏四海惟責成而任下故獨斷而
不謀特出淵衷俾司大柄雖自昔君臣之會遇如此
幾希而當今宗社之安危莫斯為重臣敢不夜以繼
日公爾忘私庶圖毫髮之勤上答乾坤之施

謝優禮表

非常之禮振古未聞不世之恩容身無所伏念臣自
嬰疹疾久限朝趨違夙夜匪懈之勤迴日月並明之
報方祈病免乃被褒升既享號於大庭仍賜告於私
室相臣如此舊典所無欲辭則阻覲於天顏欲拜則
不虔於君命進退惟谷戰兢履冰實上賴於寵臨幸
小瘳於藥物猶以足瘍為梗體力未勝詔免造朝俾
先治事愈弗遑於寧處終獲遂於未懇辭復膺眷注之
優曲就疲羸之便諒非獲已乃敢欽承肩輿及門百
辟駭視給扶入殿兩宮賜存對咫尺之天威幾顛倒

於臣節自昔元勳碩輔大老宗王公或以詢謀特加異
數豈伊庸瑣乃更超踰頤茲綿薄之餘生益恐危亡
之無日此蓋伏遇 太皇太后陛下覆載侔於天地
恩義兼於君親曲垂恤下之仁特越循常之制雖不
能陳力就列猶將使同寅協恭慙非論道之才叨被
改容之禮極臣鄰之殊遇損著定之彝儀頌雖殺身
無以報德斗筭近器蝼蟻微誠苟有益於公家唯常
致其死力

遺表

臣聞始則有終物之常理生而必死人之大期垂沒

之言哀鳴以叙伏念臣久居散地寢迫頽齡仰被眷
知遽當大任伏遇 陛下恭默思道垂拱仰成圖庶
政之惟艱登衆賢而共濟臣備位上宰總率群司嬰
疾三時卧家累月殊常之寵曠古罕聞每思糜捐無
以報稱常欲竭股肱之力繼之以死圖國家之利知
無不為雖喘息之僅存唯憂勤而不已而膏^育之苦
藥石難攻將永謝於明時猶瀝陳於愚懇伏望 皇
帝陛下務學時敏作德日新體堯舜之欽明視 祖
宗之憲度奉親思孝守位以仁永建無窮之基益隆
有大之業臣雖瞑目猶生之年臣無任瞻天戀聖哀

切屏營之至

上 太皇太后表

臣聞凡物之生必皆反本忠臣之死猶不忘君敢陳
屬續之言上達垂帷之聽伏念臣天與愚直性惟拙
迂謂古道之可行排衆言而自信常欲省躬而無愧
事上以不欺被遇 累朝照知忠藎擢居上宰斷自
睿神伏遇 陛下思齊任姒之功誕保成康之聖延
登衆正共濟多難而臣受命以來半居病告造朝之
際每荷優容蠲其下拜之勤寵以給扶之禮唯知盡
瘁以訖餘生^微聖明之時獨先隕越太平之業不逮落

成沒身有銜報國無所伏望 太皇太后陛下明昭
在位保佑有邦御六氣之中和躋群生於仁壽疇咨
哲艾慮憲 祖宗迄登濟於成功不感移於物議臣
雖終蝼蟻之壤猶依日月之光永辭聖朝無任瞻天
戀聖哀切屏營之至

為司馬公休謝賜銀修碑樓表

臣康言伏蒙 聖慈差管勾修建先臣光碑樓入內
供奉官李永言齎賜臣銀二千兩充修碑樓支費者
天恩遠臨優賜下逮銜感泣血未知所報伏念先臣
歷事四世唯堅一心晚節遭遇得行所學是以夙夜

盡瘁不敢愛身勞心役精繼之以死恭惟 皇帝陛
下天地覆載日月照臨深軫股肱之虧曲流泉壤之
澤恤典之厚超越常倫窀穸送終哀榮已極今豐碑
之建復加頒賚矜念存歿感格幽明重惟先臣儉約
清貧未嘗畜積啓手之日家無餘貲聖明燭知俾濟
終事伏思前後罕此異恩非臣隕身喪元所可上報
待盡正壘不知所言瞻望天庭臣無任攀戀號殞激
切屏營之至

為司馬植謝賜錢營葬表

右某言伏蒙 聖恩差將作監丞張某催黃河運木

就管勾先臣康殯葬仍賜錢一千貫已於今月二十四日遷葬了畢者忠如皦日痛親志之永沉德及幽泉載君仁之下逮伏念臣父康篤行成已力學傳家二聖以似其先人一旦欲加之顯任而頃因過毀已屬沉痾揜遺恨而莫伸委深恩於不報自初告卧以至喪還賜藥賜珍歸賻歸祿優命沓至常分已踰復因匠屬之鳩材俾過家塋而視塋克襄大事無費秋毫此蓋伏遇 皇帝陛下禮遇臣工孝治邦國將為世忠良之勸豈獨臣父祖之私徃者不亡當有鬼神之結草微而含氣猶知烏雀之銜環

謝 太皇太后表

致主之心已淪幽壤飾終之錫更躡舊章兆協卜之以時恩殞身而莫報伏念臣祖光以德業名世嘗擢任於宰衡臣父康以詩禮承家亦登延於勸講而侈俗方改哀楊縮之已亡太醫遽臨痛栢榮之未老無祿私室荐罹鞠凶自啓手足之初至掩窀穸之際君命屢至賙賜有加復因匠屬之鳩材俾過家塋而視塋殘喘何力秋毫在官此蓋伏遇 太皇太后仁深念切禮不遺舊將博勸於士類豈曲私於臣門克意紹先獨自期於忠孝纏哀待盡而無報於君親

太史公范文集卷第七

太史公范文集卷第八

表狀

慰

太皇太后梓宮發引表

以下代富韓公

真馭不留慈顏莫覩奄及祖庭之禮永違壽殿之名
恭惟 皇帝陛下感創至深哀號難處儼龍輜之將
駕攀鳳翼以無從凡在食毛同增隕涕臣退居田里
阻覲闕庭瞻望宸極臣無任悲哀殞越之至

慰

皇太后表

山陵脩禮儀衛啓行祖載及期真遊永遠恭惟 皇
太后殿下孝思罔極號慕難居瞻服御以如存望輜

駟而不返凡在臣庶同切哀惶臣退老田廬久違京闕不獲奔詣宮庭無任悲隕哀越之至

慰梓宮掩皇堂表

昊天罔極率土同哀遠日有期因山制禮掩玉衣於栢寢闕金殿於泉扃恭惟皇帝陛下號慕難居孝誠備至痛慈闈之永隔哀真馭之不還億兆之心感涕斯切臣身居田里心在闕庭瞻瞻宸極臣無任悲戀殞越之至

慰皇太后表

神山祔卜從先帝以上賓真宅言歸與厚坤而同

久恭惟皇太后殿下奉嚴宗廟致孝皇姑想真馭以如疑痛徽音之永遠臣退居田里阻詣宮庭臣無任悲殞之至

慰祔廟表

三殿問安音容永隔九虞畢祭廟貌惟新恭惟皇帝陛下孝極奉先感深追遠天長地久蒙休佑以無窮春禘秋嘗惟時思而匪懈伏願節哀順變調瞻御宜仰奉宗祧俯安區寓臣阻陪慰覲徒切悃誠

慰皇太后表

仙仗徐還容衣長掩升靈清廟合食宗彝恭惟皇

太后殿下追慕增深哀懷罔極惟春秋之孝享感雨露以時思臣不獲奔詣宮庭無任悲殞之至

賀同天節表

伏以朱火司辰薰風應律當真聖挺生之旦乃皇家累治之期罄海宇以傾心望帝宸而獻祝恭惟皇帝陛下躬膺駿命寅御寶圖體乾健以當陽向離明而布治流虹紀慶甲觀延祥文軌所臻華夷胥抃臣叨塵三事親際千齡退老故廬阻趨魏闕處陶唐之俗豈知帝力之深效華封之民但祝聖人之壽

乞免赴明堂大禮陪位表

合宮歲事將嚴宗祀之儀宸檢頒恩俾預駿奔之列顧惟衰老實切兢惶恭惟皇帝陛下聖孝日躋慈仁廣被秩百王之盛典因四海之歡心對越上靈陟配昭考執籙在列拱俟甸以同寅鳴玉造庭儼臣工之率職何圖求舊亦齒陪祠伏念臣自處田廬久嬰疾疢步趨多梗拜伏為艱惧隕越以無堪頽恪恭而難勉徒荷乾坤之施曲迴日月之光唯同擊壤之氓預享寧神之福心搖魏闕莫申顯相之容夢想鈞天阻聽我將之頌臣以老疾不獲依詔奔詣闕庭無

任瞻天感聖戰汗激切屏營之至

謝詔書允所乞者表

昭事上帝神特降陪祠之召閔勞黃髮復推從欲之恩
祇荷寬優伏增榮悻伏念臣久塵爵位無補聖明雖
退老於故廬實係心於魏闕尚紆宸眷存沐恩波將
嚴饗帝之儀俾預造庭之列虔奉自天之命豈當俟
駕而行俯念殘年素甘多疾奏囊封而懇惻望震極
以跼蹐莫克駿奔惟懷惕厲伏遇 皇帝陛下至仁
廣覆大德兼容知其筋力之衰既難為禮免其道路
之苦俾遂養痾頒溫詔以撫存荷清衷之矜允禮加

舊物風厚寰區異畢餘生仰酬鴻造

賀明堂禮畢表

五室奉祠嚴 祖宗而陟配諸神受記祚邦國以流
光熙事脩成晉天同慶恭惟 皇帝陛下虔恭寶位
駿惠先猷澤浸群生化孚四表建大中而順帝茂馨
德以事神載謀載惟祇率精禋之典我將我享式隆
孝治之風物采脩陳福祥紛委御中天而發號普率
土以均恩書軌所臻動植咸遂臣退居田里阻覲闕
庭徒傾就日之誠莫預稱觴之列

辭免轉司徒表

明綰忽降寵數併加內自省循交深震慄伏念臣本
由孤進仰會先朝擢居三事之崇謬處衆賢之列
當仁祖御圖之久惟英皇毓德之初於時執政
之臣肇啓建儲之議計安社稷乃惟報國之宜力贊
聖明是亦秉均之職九廟威靈以在上慈闈保
佑以居中景命有開大統終集實由天啓諒匪人謀
敢伐善以稱功期抱忠而以沒世年踰二紀事歷三
朝退安田里之居俯迫桑榆之景豈意故臣之奏議
仰紆當宁之覽觀特簡淵衷遽形哀詔敷聞華夏震
聳簪紳渙大號於明庭霑鴻恩於私室發自睿斷匪
由僉諧特遷五教之司益重三階之秩頽茲衰朽敢
冒寵榮且既往之功復何足錄而非常之澤義所當
辭伏望皇帝陛下俯亮丹誠慎行過賞聽輟出綸
之命免貽據蒞之災重念臣早玷近班素安拙分年
將及耄寵則踰涯已竊位於公槐仍兼華於將鉞當
知止之日豈饗榮之時雖蒙虞帝之念功曷稱武公
之善職由衷之請報可是期

謝明堂加恩表

世室奉祠明庭渙號鴻恩俯被黃髮為榮伏念臣素
乏異能早逢亨會荷三朝之眷遇秉二府之鈞衡

徒膺體貌之隆豈有涓埃之補迨引年而遂請蒙佚
老之推慈獲偃息於故廬幸優游於聖日此者伏遇
皇帝陛下講求國典親饗明堂對越上靈嚴配 昭
考受皇天之篤祐擁宣室之蕃釐麗澤豐融羣生鼓
舞荐紳蒙福朽枿回春頽惟殘槁之姿均被厯鴻之
渥矧更新於官制特序正於文階圖鼎飪之前勞形
贊書之厚獎哀悰感慨舊華光華雖居猷畝之微敢
忘天地之施

謝轉司徒表

渙汗難收未容懇避宸章申答重荷褒嘉祇受以還

震惶無措伏念臣早緣末學進齒清朝誤蒙 仁祖
之知擢備宰司之位迨 英皇之嗣服長樞府以秉
均曾無補於聖猷遂出修於藩職熙寧初載睿哲統
天入居論道之司重辱改容之禮屬嬰疹疾靡效毫
分幸賴曲全始終久遂體佚豈意登儲之請仰闕當
寧之懷特追念於前人勲俾對揚於休命願臣何力冒
此殊榮此蓋伏遇 皇帝陛下駿惠先猷纂隆下武
推至仁而求舊舉懋典以記功上昭 神祖之明丕
承 文考之志不遺毫齒猶錄微勞雖貪天之功古
有明戒而惟帝之念敢不奉承當仁寧負於覲顏追

孝實彰於睿德昔為羽翼之助者隱不復顯書龍蛇
之詩者死而後知逢時之榮在臣何幸願迫桑榆之
景曷酬天地之仁

謝男受閣門祇候表

有命自天延賞于世祇奉宸旨弗獲懇辭俯念衰遲
豈勝感慰伏念臣本興孤族幸守素風唯忠孝以傳
家非公侯之繼世致位上宰席寵三朝何圖退老
之時猶被褒功之典中台進秩弱息預榮斷自清衷
加於私室此蓋伏遇皇帝陛下天臨萬寓子育黎
元追先帝之升儲眷輔臣之定策以為固社稷者

猶將宥其十世詔爵祿者所以馭於羣臣體虞帝之
寬仁法周家之仁厚特推懋賞以及貳宗因垂勸於
將來故深矜於舊物臣敢不知恩所自重義於生雖
典謁無能益勵教忠之訓倘折薪克負俾酬及幼之
仁

辭免冊命表

君牙拜命祇聖訓以奉承史佚贊辭在臣工而曷稱
輒彈烟幅上冒高明伏念臣起自諸生謬塵三事乏
代天之遠用竊浮實之隆榮眷求輔政之初嘗有登
儲之請因推懋賞追錄微勞矧惟告老之人當避涓

辰之禮伏望 皇帝陛下特廻睿聽俯徇私誠罷法
宸之臨軒寢明庭之發冊庶安止足之分免昭過溢
之尤

慰 慈聖光獻太皇太后大祥表

再朞之喪三代所共禮制有限聖情無窮適臨祥事
之辰深切永懷之感伏惟 皇帝陛下奉先思孝追
遠厚民體高宗之宅憂同大舜之終慕上遵祖統虔
遵服重之文仰法天時俯就立中之制淵衷軫念率
土同哀臣以告老不獲奔詣闕庭 云云

遺表

臣竊以天地者生成之本故物終必復其初君父者
倫類之先故人死不忘其報垂沒之懇泣血以陳伏
念臣夙以薄材起於孤族思有為於當世竊志學於
古人進會休明浸躋華顯奉使方強之虜馳身不測
之淵仰憑宗廟之靈復繼 先皇之好 仁皇帝以
臣粗知忠義嘗冒險艱擢自諸生俾司大政 英皇
纘服 慈后臨朝入長天樞助宣聖化 陛下大明
繼照濬哲統臨祇適先朝獻春求舊物延登三事委總
萬機任遇不殊於 兩朝優禮實冠於群后而臣拙
謀無補衰疾有加乏期月之成功辜帝心之妙簡守

藩無狀報政蔑聞俄得請以告歸俾養病而自便曲
全終始許遂退休間者聖孝奉先皇明燭隱尚恭策
勲之拜特遷掌教之司而臣沈瘵日侵顏齡愈迫蓋
桑榆之向盡非藥石之可瘳重念臣歷事三朝辭
榮一紀年登八十位正三公進則光顯於朝廷退則
安佚於田里在臣揣分何啻踰涯故雖喘息之僅存
唯抱忠誠而不已臣常思竭股肱之力繼之以死狗
國家之急奮不顧身苟蹈義而可為雖沈疾而不悔
今乃幸終牖下獲盡天年將歸窀穸之墟莫效糜捐
之節願瞻白日曛戀明時受恩不貲圖報無所伏望

皇帝陛下欽承寶命光宅慶基養氣志以如神憲聰
明而作后臨下以簡守位以仁躋俗雍熙之期納民
富壽之域臣雖瞑目猶生之年臣永辭聖世無任瞻
天戀聖激切屏營之至

代范堯夫辭給事中兼侍講狀

右臣準閣門報已降告命除臣給事中兼侍講者臣
竊以門下封駁之職實惟出納之司苟非公忠正直
之人無以振舉綱條論議得失選任所重實難其才
伏況陛下日親儒臣啓發聖學勸講帷幄敷陳典
訓必得經術行誼之士厚重端方之臣緝熙光明陪

侍左右臣久去朝廷待罪外官識智闇淺記問涉獵
加以衰遲心神耗廢學憂不講經患不明將何以供
奉禁密仰承訪逮兼是二職皆非所堪聞命震慄靡
所自容又臣與司馬光舊為姻戚臣隸左省義亦有
嫌伏乞天恩聽許引避亟收誤寵遴簡眾賢必得
時髦以副眷委所有告命不敢祇受

代楊中散遺表

臣聞生則盡忠乃人臣之常守沒猶有恋惟君父之
難忘輒陳忍死之言仰瀆蓋高之聽伏念臣早由科
舉進齒仕途慎守詔條悉心民政惟謹廉而潔已

勤恪以在公未嘗枉道以事上官附勢而取高位宰
司五邑典守三州雖無可紀之能薄有見思之愛徒
積勞於歲闋遂升秩於卿曹洛邑分臺蓋免官_守摩之
責祠庭領職益懷尸祿之慙伏遇宗祀熙成鴻恩普
被更新官制數錫臣工_特揚易文階仍疇封邑而臣顏
光已薄衰病內侵杳杳重泉將歸於幽壤昭昭白日
永謝於明時願無論報之因徒切哀鳴之懇伏望
皇帝陛下御中和於六氣同長久於二儀聚會百祥
覆庇四海臣雖瞑目猶生之年重念臣自歷官涂踰
五十載未嘗被監司之刺舉煩朝憲之譴訶內揆始

終實無愧悔猶希漏澤俯及微宗輒歷悃誠敢授授故
實臣今有孫男某粗承家訓未齒官榮伏望 聖慈
特賜於文資內安排臣永荷及泉之恩敢忘結草之
報臣無任瞻天恋聖激切屏營之至

代唐通直提點利州路刑獄謝上表

中宁頒恩外臺領使載驅傳遽已案部封祗荷甄升
伏增震悸伏念臣材資最下術業無聞徒服教於義
方遂策名於士路備員冗吏絕意榮階蒙召對於燕
閒獲親聆於謨訓會有嶠南之役俾為湖外之行惟
罄忠勤惧辜選使擢參公祿旋屬家艱起哀疚之餘

生貳轉輸於外計猥惟孤進盡出淵衷當右輔之劇
繁頽小材之繇薄一塵官次三換歲華曾無奏最之
能宜被黜幽之典敢期易地仍委案刑叨任使之寢
隆荷寵靈之下矚惟岷梁之舊域邇庸蜀之奧區封
壤雖遐獄訟素簡俯容策勵分職紕度此蓋伏遇
皇帝陛下剛健博臨高明廣照總覈英髦之效不遺
踈遠之臣特收轉餉之微勞進脩宣條之乏使臣敢
不上體欽恤志期肅清俾山谷之遐氓識朝廷之惠
澤益殫犬馬之力圖報天地之私臣無任
代楚待制謝再任崇福宮表

宸宸頌恩琳宮分職載循衰朽祇荷寬優伏念臣世
緒單平天資闇淺誤膺煩使寢履榮塗曾無尺寸之
長諒之消埃之補延登天閣久塵侍從之班委總介
藩荐被干城之寄自成歸於外閫獲退領於祠庭屢
易歲華坐糜祿廩及茲滿秩輒復冒聞敢期從欲之
仁特遂庇身之請此蓋伏遇 皇帝陛下至仁天覆
大德海容無一物之遐遺俾群生之咸若故維蒲柳
之質特猶霑雨露之私冀竭微誠仰酬洪造

代忠文公遺表

臣聞生也有涯卒隨於物化人之將死尤切於情言

易箒以正其終視壙而知所息敢忘忠懇仰列睿聰
伏念臣起自孤生出逢華旦蚤脩諫垣之職誤膺
仁祖之知入 三朝之禁林侍 二帝之經席堅一
心而事上冒萬死以進言荷山海之兼容返耕桑而
自樂伏遇 陛下大明出震盛德承祧延登正人眷
求舊物錄臣初議進陟峻班遠追尚齒之風特降通
英之召而臣已不任於筋力阻趨覲於威儀願既獲懇
辭復遂休佚竊惟禮樂之大實繫國家之隆臣在先
先朝嘗陪末議是敢輒伸所學猶惜餘生克諧金石
之音仰脩廟堂之奏方志願之永畢迫年齡之已頽

倘聖作明述之有成則朝聞夕死而無憾伏望
帝陛下日躋聖敬時憲聰明畜德新其輝光典學念
於終始刑孝風於四海冒仁澤於群生追堯舜之隆
名揚祖宗之大烈臣雖瞑目猶生之年臣永辭聖
世無任悲戀激切屏營之至

上 太皇太后表

臣聞自古有死乃前聖之訓言君子曰終亦先賢之
志願啓手足而知免視正原而與歸猶陳垂沒之誠
上達蓋高之聽伏念臣本由孤進素乏異能被遇
仁皇擢居諫省期於死職不敢愛身暨蒙 英祖之

知再入禁林之直

神宗皇帝召從近輔復寘邇聯

唯堅一心如事

二帝辱賜骸骨許歸田廬荷天地

之兼容戴正山而莫報犬馬之齒踰八十年麋鹿同
遊幾二十載伏遇 陛下翊扶真聖保佑丕基登進
群賢眷求遺老錄至和之初議加秘殿之華資仍推
延世之恩以及負薪之息召陪絰幄起領祠宮特矜
枯朽之餘再遂佚休之請得以考正鍾律之法講明
禮樂之原莫獲造庭克諧奏御方同百獸之舞未覩
三雍之成而臣年已迫於桑榆疾無瘳於藥石將歸
黃壤難戀明時方今天人和同夷夏歡悅功莫於高

任姒俗將濟於成康倘制作之有期雖隕越而無恨
伏望 太皇太后陛下深惟廟社之重仰對 祖宗
之休澄宸慮於繁機納天和於冲氣加膳玉食願神
法宮永庇烝民之生益隆萬壽之祉臣永辭聖世無
任悲恋激切屏營之至

代呂正獻公遺表

臣竊以死不忘君乃人臣之常節窮則反本惟生物
之大情雖餘喘之至微猶孤忠之未泯伏念臣蚤由
末學進備邇聯重膺累聖之知克紹前人之烈材力
不逮豈期位列於三公氣血早衰敢望年踰於七十

伏遇 陛下踐盛德之祚擁無疆之休思庶政之惟
艱圖舊人而共濟給扶以登文石之陛特班以拜大
昕之朝願未能致主於唐虞躋民於仁壽慙無補袞
之效已迫首丘之期伏望 皇帝陛下思 先帝之
緒以遺大投艱奉 文母之訓以永世克孝不替詢
謀於黃髮勿忘視戒於丹書作德日新務學時敏無
為以守至正好問而察邇言崇成聖功永對宗祏臣
沒而不朽尚依日月之末光死者有知雖為泉壤而
受賜臣無任瞻天恋聖激切屏營之至

上 太皇太后表

臣聞學不羨生古皆有死惟歸全而知免乃得正以
告終敢忘垂絕之言上冒蓋高之聽伏念臣夙聞前
訓蚤服近僚席累世之弓箕備六朝之鼎鉉升降
相與休戚是同伏遇陛下思齊任姒之功誕保成
康之聖延登衆正共濟多難而臣入侍經帷進陪冢
席獨膺一相之任愧乏三年之成屢陳請老之言歷
罄避賢之懇重辱改容之禮特躋論道之司同軍國
之謀謨參師保之輔導尚貪天寵徃踐世官惟高位
之疾顛矧羸軀之多病僅存殘喘猶抱孤忠雖深軫
於慈宸訖無瘳於眩藥伏望太皇太后陛下儲神

蠖濩澄慮穆清疇咨哲艾之良頌謨祖宗之憲納
民仁壽躋俗雍熙則臣雖委骨於重泉猶銜恩於永
世臣無任瞻天戀聖激切屏營之至

太史范文集卷第九

表

賀升許州為穎昌府并德音表

以下代王樂道侍讀

伏覩某月日 勅命升許州為穎昌府今月某日

德音赦穎昌府管內徒罪以下并蠲放秋稅進士免
解賜耆老粟帛祭山川祠廟者太嶽舊封伊昔建旄
之地黃圖近輔惟時啓聖之基爰錫嘉名特開新府
上奉 祖宗之慶俯慰臣民之心當宸頤懷寰區抃
蹈臣竊以帝堯光宅肇發於唐邦孝文纂承越從於
代即然未有邇王畿而夾輔固宗子之維城遂升明

兩之輝以久太平之運珍圖大定景命有融考濬哲
之勃興在冊書而絕擬恭惟 皇帝陛下大明出震
盛德統天丕承 五聖之休高視百王之表惟 英
考御圖之始席 仁皇累洽之期 陛下天授至神
地居上嗣溫文夙茂淵懿日躋於時特隆主器之儀
初被撫軍之寄疏封東土杖鉞南邦允當四海之宅
心奉答皇天之眷命旋膺帝典登踐儲闈歷數在躬
謳歌歸啓運屬離明之盛歲踰星紀之周命式九圍
光被四表乃眷興王之舊聿懷追孝之誠冠穎府之
太名即許昌之故號合為美稱用協休祥明命惟新
鴻恩下霈宥罪寬賦招亡禮神甄錄賢能優恤耆老
人祇共喜動植交歡况臣被遇青宮觀光朱戟潛躍
之始攀附最先仰麗澤之荐加與群黎而同慶阻預
稱觴之列徒傾就日之誠榮幸之私倍萬倫等

謝傳宣撫問表

今日日入內內侍省內東頭供奉官某乙至西京伏
蒙 聖慈以 大行太皇太后山陵升祔葬事臣幹
治悉已辦集傳宣撫問并賜臣茶一銀合者 先后
在天方飭尊崇之禮尸臣謹職特加撫諭之恩拜以
受言感如挾纊恭惟 皇帝陛下德齊天地孝格神

明銜罔極之深哀嚴送終之大事瞻原陵而感慕知
臣子之勤勞臨遣使軺俯傳天問念違離之歲久憐
衰朽之力殫載聽絲言如親咫尺乃頒茗飲俾滌冥
煩况臣早翊儲闈今司宮鑰夙夜匪懈惟知勉效於
公忠日月有明敢謂特迴於私照益當盡瘁仰答見
知

謝山陵禮畢表

今日十日 慈聖光獻太皇太后山陵禮畢者雲收
仙馭從列祖之威神天作崇正與厚坤而長久克終
襄事幸免瘵官伏以 先后扶持保佑之功邦家永

賴 陛下報復尊崇之志典禮極隆申詔有司恪供
大事嗟上賓之遽遠迫同軌之屆期臣夙夜在公寢
食俱廢猶惧不及豈敢違寧資群吏之鳩功王致多儀
之肅給此蓋伏遇 皇帝陛下大孝格於天地至行
感於神明遐邇一心中外畢力靈祇幽贊先寢永寧
曲全守土之臣俾逃曠職之咎臣荷恩實厚居守方
遙無任瞻天望聖激切屏營之至

祔葬禮畢謝表

今日十日濮安懿王二夫人祔葬禮畢者寢園祔卜
真宅言歸克成三板之封永閔六珈之服訖無曠失

苟道譴訶臣竊以濮王二夫人福慶所基音容久翳
未備葬禮實軫聖情因展事於橋山俾制儀於藩國
二役並作庶功實繁迫先遠之屆期幸烝徒之克集
此蓋伏遇 皇帝陛下孝嚴宗廟敦睦懿親追遠以
厚生民送終以當大事禮儀悉備兆宅以安上承
英考之聖靈永慰濮園之泉壤惟庀司之官守免獲
戾於簡書臣分職留都阻覲宸闕無任瞻天望聖激
切屏營之至

謝宣賜銀絹表

伏準宣命以臣修奉 慈聖光獻太皇太后山陵了

畢賜臣銀一百五十兩絹一百五十疋者橋山展事
曾無述職之能宸宸頒恩猥被賞勞之典載自惟省
深積覲慚臣聞以庸制祿則下不覬覦先事後得則
人無僥幸故功大者其禮厚力勤者其報優授受靡
虛勸沮斯在伏自軒宮掩耀宸極纏哀四海遏音共
奉宅憂之政萬邦同軌恪承送往之儀而臣居守都
畿典司陵寢固當上體聖孝祇率官常竭臣子之至
情奉邦國之大事庀徒僅集卜兆克成皆上稟於睿
謨實俯資於衆力凡居執事敢悼服勤至於道路所
經次舍之設唯懼不供之獲罪豈謂有勞而可書錫

外府之貢金加正園之貢帛頌茲忝冒深切兢惶此
蓋伏遇 皇帝陛下大孝格天至仁育物使人不求
其備序情而閔其勞上嚴 聖后之喪內盡 神孫
之志務從優厚以稱尊崇願無補於涓埃亦預霑於
寵賚雖賞之寧僭曲存勸善之方而受以無功豈追
伐檀之刺誓殫忠力仰答恩私

皇后賜絹謝

皇帝表

雲輶遠降方展禮於因山星使俯臨遽頒恩於守土
宮庭之積私室是克祇受以還兢惶無措伏念臣典
司筦籥營奉陵園駿奔遠郊迎扈仙蹕屬母儀之宙

路修官守以在公曾無供億之勞僅免曠瘼之責已
荷內朝之大庇復叨實籩之殊恩仰戴便蕃實為僥
冒此蓋伏遇 皇帝陛下教先宮壺德御家邦禮尊
奉於宗祧惠曲加於臣子體乾坤之覆載品物不遺
並日月以照臨光明下濟推恩有自論報何階異竭
愚衷少酌鴻造

謝德音表

陵寢即安甫終於大事宗祧升祔肅奉於明禋孝惻
宸衷恩覃甸服詔音所被蠢類相歡恭惟 皇帝陛
下祇適詒謀布昭明德極奉終之盛禮廣立愛之慈

仁眷言二宅之郊爰及三城之壤陵土既復役車告
休謂真馭之所游意聖靈之降格哀矜庶獄悉緩於
青災甄序百工特疇其勤績賜田租於農畝蠲屋粟
經塗開釋逋逃之辜申嚴樵採之禁恩被動植德歆
神人臣等分職留都叨司陵邑恭陪營奉幸免曠瘵
已蒙寬宥於簡書更獲寃宣於睿澤感抃踴躍倍百
常情

慰蜀國長公主薨表

臣某言得進奏院狀報今月十七日蜀國長公主薨
謝輟朝五日者主第纏哀天支掩秀訃傳中夏慘結

輿情伏以故蜀國長公主柔靜宜家肅雍成德鍾
先朝之至愛有賢女之令聞姆教弗煩化風自遠早
築王姬之館大開蜀土之封宜茂享於脩齡永增徽
於寶萼而穠華蚤落眩藥無瘳倏為降渚之游遽終
歸妹之祉恭惟 皇帝陛下念深同氣愛本篤親趣
駕臨喪驚復衣之不返廢朝出令極卹典以追榮况
宗祧之升祔猶新昭寢之哀思未遠重此悲惻撓夫
睿神伏願推理於難諶割情於無益上釋慈闈之悼
念俯安群下之憂惶臣掌鑰留都違顏法坐莫由慰
覲徒切悃誠

賀明堂禮畢表

饗帝報功極聖人之能事配天嚴考舉有國之盛容
熙典脩成鴻恩誕布聲明所暨抃蹈攸同恭惟 皇
帝陛下神智在躬至仁守位法陶唐之稽古專講於
舊章效帝嚳之執中丕冒於群品荷三靈之眷命因
四表之歡心練日季秋戒期百執齋宮蠖濩儲精意
以致虔清廟顯嚴展孝思而入裸然後御六龍而旋
軫躋五室以交神黍稷馨香式昭於明德金石擊拊
脩荐於和聲辟公顯相以在庭侯衛駿奔而率職靈
心昭格景貺荐臻發大號於中天均洪休於率土異
風鼓舞兌澤豐融九在萌生率同茂遂臣幸班持橐
阻預侍祠守籥留都病歎周南之滯受釐宣室何階
前席之榮

謝傳宣撫問賜藥差醫官表

今月一日某官某乙至西京伏蒙 聖慈特賜傳宣
撫問并賜臣湯藥一銀合仍差醫官某乙看醫臣所
患者王人俯降天語遙臨頒藥品之良俾蠲除於積
疾詔醫師之屬就診療於微軀九死之餘再生可望
祇荷憫恤伏切兢惶伏念臣自領留都實殫拙力願
久尸於爵祿異少效於涓埃惟成周分正之郊素稱

多事屬 先后因山之禮仰迫嚴期夙夜在公寢食
俱廢唯知竭節且昧養生甫及暮春已動累年之病
苦載離炎暑復加百體之疴羸寒熱交爭於肺腸瘡
痛外毒於肌革精魂飛越蓋積勞而損神視息眇繇
嗟鮮食而伏枕藥餌苦口極眩暝而弗瘳疾痛呼天
迫困窮而返本輒傾血懇仰顙宸閣豈謂 皇帝陛
下曲記舊臣特迴睿眷恩深覆育軫父母惟疾之憂
德過生成念犬馬至微之命遠馳星使傳諭堯言仍
分御劑之珍更委國醫之妙慈仁俯被沉瘵復醒蘇頤
茲望外之所加豈盡生涯之可報臣謹當專精飲藥

委命就醫倘肉骨以生存誓沒身而酬補

辭觀文殿學士正議大夫表

恩惟求舊賞乃及私聞命若驚撫躬無措伏念臣本
由孤進仰會 先朝徧躋臺閣之榮詎有謀猷之補
徒以朴忠少與狷直自將當 陛下潛躍之初首東
朝翊護之選回淵講學最承訪逮之私內寢問安日
奉溫恭之德寢叨誤寵進履亨衢掌右掖之贊書奉
西清之密議旋升內閣之直出領全秦之師屬景命
之有開方儲闡之肇建亟膺嚴召俾預下僚遽承英
馭之賓天幸會飛龍之撫運擢居憲府曾無報稱之

能斥守輔藩曲荷保全之力越從舊許入領大農復
違去於邇顏尚保釐於西洛守符屢易報政茂聞俄
得請於別臺幸即安於私館衰遲晚節踳躑十年已
絕望於榮塗唯係心於魏闕間自淮陽之卧再司鼎
邑之繁疲力已殫顏齡寢逼養生素拙多病日侵既
歷三時僅存餘喘曠療斯久隕越是虞方哀籲於宸
閣丐生還於里舍忽奉自天之命特加躡等之恩載
自揣循實為僥冒伏望 皇帝陛下至明日照洪造
天垂延登俊髦慎假名器聽輟出綸之命俾安據蒞
之憂况當 陛下旰食九重勵精百度憲章前古董
正治官曷可無功而進階豈容越次而受職輿情共
駭自訟何安重念臣疾疢未瘳醫療方切實惧滿盈
之咎敢叨寵數之榮高位疾顛昔賢明戒由衷之請
報可是期

謝觀文殿學士正議大夫表

渙汗難收絲言俯諭未容懇避徒積兢惶共惟先
朝經始內殿聚典學之古訓延脩問之宗儒擇人甚
艱其職多闕必踐二府乃居此官未有負越等夷輒
假名器 上聖有作百度惟新稽古建官任人立政
始定大夫之位以易貳卿之聯諒惟考績之明乃預

升階之典如臣者識非慮遠學不知方歷事三朝
叨塵二禁震闈調護慙無羽翼之能旬服蕃宣屢被
股肱之寄素甘多疾久去近班荷大德之包容嗟微
生之屯阨自膺 睿旨再領留都甫及周星半居病
告危衷備列委照曲臨蒙降侍醫俯救殘喘荐被出
綸之命併加躡等之恩內揆無功敢當誤賞雖露章
之甚苦終賜禮之靡俞祇服寵榮實踰涯分此蓋伏
遇 皇帝陛下布昭明德保宥群生承 英考之烈
光御寰區之泰定謂啓封之地已優復於黔黎賜履
之邦亦惠霑於動植追惟潛躍之始猶錄攀附之勤

因宗祀之休成霈鴻禧而普被方叙勞於庶尹亟興
念於遺簪推穎卽之餘恩記儲宮之舊物力排群議
深簡 聖衷將特示於寵私故靡循於功次臣敢不
益親醫藥強整筋骸冀畢桑榆少酬塵霧

謝加開府判大名表 以下代韓康公

進階極品易鎮別都懇避莫遑冒榮有覲伏念臣才
非經濟識昧幾深兩塵鼎鉉之司累玷節旄之寵頃
從祠館起涖洛師迫 神考之遺弓奉 裕園之復
土遽被中天之命再叨朔部之行肆覲闕庭仰祈旒
宸異遂乞身之請靡收渙汗之恩頌殘槁以何堪豈

勤勞之敢^憚勉祇成命深積愧懷矧乃相印聯華天
倫並列逢辰之幸曠古莫儔此蓋伏遇^皇帝陛下
濬哲統天至仁決物責成群后分治九圍圖任舊人
特舉懋官之典奄受北國俾修述職之勤誓竭疲駑
仰酬覆育

謝太皇太后表

禮均三事寵冠文階節制諸軍任隆藩閫伏念臣早
緣末學進齒近班被遇累朝歷年四紀雖朴忠之
自竭無嘉績之可書夙聞知止之風屢有告歸之請
邇者對揚宸陛親奉德音疊貢需章特紆使節

懼頻煩於睿旨敢確守於私誠終叨將相之榮尚
被腹心之寄願循朽質深切汗顏此蓋伏遇太皇
太后陛下保宥群生照臨萬國眷求舊物宣布上仁
錫以龍光茲及臣工之品倚之屏翰特嚴宮鑰之司
唯誓糜捐以圖報稱

辭免恩命表

恩唯厚下曷可誤加賞異及勞豈容虛受伏念臣早
塵上宰出守別都愴神馭之賓天屬橋山之卜壤八
荒同軌極喪考之深哀七月戒期嚴送終之大事而
臣典司陵邑申畫畿封暨復土之克成乃居官之所

職唯虞獲戾敢謂書勞上簡聖衷誕宣庭告進陪
多賦衍食真封懍如蹈涉於冰淵敢避瀆煩於旒宸
伏望皇帝陛下特迴宸聽深亮愚誠亟收出綽
之恩俾追伐檀之刺恭祈報可詎敢飾辭

上太皇太后表

明綸荐降寵數併加義所當辭情難冒處臣向以典
司宮鑰修奉寢園竭臣子之至情嚴邦國之大恤實
唯官守非曰事功而况萬國會同百執奔走共奉因
山之禮豈繫守土之勤麗澤天垂明庭宸告益疏井
賦增食爰田夫何送往之微勞乃預報功之懋典伏
望太皇太后陛下曲迴睿聽深軫淵衷輟成命於
已行慎褒章之或過俾安愚分庶協公言

再免恩命表

記功惟厚祇寵靡遑恭布危誠未奉俞旨臣竊以慎
終追遠以敦教義之風送往事居當竭公忠之力臣
備位藩鎮服勞國家何足言功乃蒙推賞伏望皇
帝陛下慎司名器深察肺肝特寢過恩免貽公議

上太皇太后表

宸暉下濟睿澤曲加敢避瀆煩必期俞允臣竊以命
書之寵井賦之封表疏爵之隆恩係馭臣之大柄非

其分義雖一介以難加苟有勲勞則萬鍾而可受臣
職當居守禮在奉終乃事國之所宜頌何顏而冒慶
伏望 太皇太后陛下俾人浮食慎賞因功深矜悃
幅之誠特輟褒優之命

謝表

因山制禮奉 神考之真遊復土書勞錫尸臣之壤
賦弗容懇避唯切兢榮伏念臣席寵備累朝受恩奕
世義均休戚任處蕃宣方聖宇之宅憂當臣工之走
職共襄大事咸底庶功惟殫夙夜之勤敢期日月之
照此蓋伏遇 皇帝陛下奉先思孝守位以仁眷惟

西屏之臣實司同軌之會爰加懋賞特越常倫益圖
報國之忠仰答念功之賜

謝 太皇太后表

命出告庭恩加守土懇辭弗獲祇受尤慙伏念臣頃
泣別都奄承遺訓方切上賓之痛已驚先遠之臨祇
率群司克集大事而况中外咸獻其力遐邇各致其
誠豈臣獨勞膺此異數此蓋伏遇 太皇太后陛下
穆清垂照睿哲宣慈知臣子之服勤重原陵之送往
贊書示寵率土知仁誓竭精忠仰酬鴻施

北京謝上表

分正成周獲辭宮鑰偃藩全魏復總兵符祇荷寵光
伏增震悸伏念臣久塵近列仰際先朝委秉洪鈞
再司上宰一違鼎鉉累建節旄引年則過於從心報
國唯知於盡力頃從西洛入覲邇顏歷陳匪石之誠
願遂歸田之請疊膺睿旨莫奉俞音終叨袞鉞之榮
重被翰垣之寄此蓋伏遇皇帝陛下仁如天覆明
與日升方庶政之始初飭群工而勵翼深簡股肱之
舊曲加體貌之隆乃登進於文階俾殿臨於巨屏臣
敢不上體至眷乃心本朝虔修述職之勤勉企壯猷
之效誓堅晚節仰答鴻私

謝

太皇太后表

保釐洛宅曾無分正之勤偃息魏藩更委居留之重
方臨舊部祇荷渥恩伏念臣被遇累朝歷年四紀
秉鈞宰席再塵上衮之司授鉞齋壇荐忝元戎之寄
唯朴忠而許國無敏智以過人願迫殘年久尸厚祿
未遂乞身之請復膺渙汗之恩此蓋伏遇太皇太
后陛下懋建大功敷求至治仁惟圖舊道在宣慈眷
郭隄危耕桑失肆貢老臣之緩緝分聖宇之憂勤特
加三事之宜俾修連帥之職臣敢不恪恭夙夜強勉
事為庶圖毫髮之功上答乾坤之施

太史范文集卷第九

太史范文集卷第十

表狀

賤功德疏右語附

求退第一表

以下代文潞公

竊以不能者止蓋量力以效忠有疾則辭豈愛身而
 避事輒殫悃幅上冒高明伏念臣學古迂疎受材淺
 薄惟不欺而行已敢有志於濟時徒以辱先朝過
 聽之知荷陛下非常之眷越從散地擢處近司雖
 智力之已窮諒毫分之無補屬嬰衰病累涉旬時沉
 綿幾及於膏肓羸瘠僅存於皮骨桑榆向暮藥物難
 瘳未知朝謁之何期唯恐顛濟之無日千鍾賦祿豈

高卧而可當三事列居非養病之所處夙宵興念惕
厲匪寧何待人言固當自省伏望 皇帝陛下仁深
惻隱明燭幽微曲成萬物之宜不奪匹夫之守使其
全進退之義察其無矯激之心早賜允俞俾遂安養
伏乞除臣宮觀差遣一任下情上達必冀於感通人
歆天從誓期於得請

二

忱辭仰請初冀於必從溫詔報聞敢煩於曲諭荷并
容之至廣增危懼以彌深再瀝由衷仰祈垂鑒伏念
臣少而志學出則事君豈徒干祿以代耕願已委身

而許國竊欲粗行其志庶幾有補於時在猷畝以無
忘矧廟堂之或處自陪機政思竭愚忠蓋欲知無不
為期於死而後已倘非疹疾敢就便安蒙賜告之恩
已將采月在具瞻之位曷可瘵官久處公居坐尸厚
祿豈敢慕名而自潔蓋惟揣分以難安伏望 皇帝
陛下感動至仁哀矜舊物迴大明之久照察一介之
微誠賜以殘年全其素守使得上還重任退即散僚
則臣永荷生成之恩猶圖隕越之報

三

疾難自力蓋將止於不能聽未及卑尚莫從其所欲

敢避再三之瀆終祈開可之私臣伏自學古以入官
常欲捐軀而報國在下位猶將竭力備輔臣豈敢憚
為所指者難際之時所處者可行之地初心未遂羸
疾已侵強力外殫疲神內竭革膚日削食飲至微顧
此形骸已臨溝壑况復春存特厚禮貌加隆累降侍
醫頻煩詔使垂天地大生之德軫父母惟疾之憂展
轉伏思戰兢無所非不歆力圖報塞勉就痊除而勿
藥難期造朝曷日所以懇祈引避實不遑寧伏望
皇帝陛下深諒至誠曲加大惠察臣力小而任重閔
臣福過而災生處以閒官俾安攝拙分肉骨之賜沒身

敢忘俞允為期屏伏以俟

再求退第一表

竊以論道經邦惟人乃可以勝其任陳力就列不能
曷可以強其為輒瀝愚誠上千天聽伏念臣久安散
地寢迫頽齡猥以薄才遽當大任伏遇陛下恭默
思道垂拱仰成圖庶政之惟艱登衆賢而共濟臣備
位上宰總率群司而嬰疾三時臥家累月虧君臣之
至敬損著定之常儀每自省循不遑啓處威顏咫尺
莫伸下拜之勤病骨支離猶貪攘臂之祿復以足瘍
為梗步履益艱賜告滋多在公幾廢不唯非養疾之

所亦恐違責任之宜豈可瘵官猶將卒歲伏望 皇
帝陛下曲垂昭鑒深惻至仁閔枯槁之逢春榮華無
幾哀疲駑之盡力驅策何堪特解近司俾安散秩倘
未填於溝壑猶圖報於毫分

二

囊封有請恭布悃誠綸旨載頒曲垂訓諭荷春存之
至厚增惕厲以彌深敢避瀆煩必祈開可臣伏以君
為元首臣作股肱休戚所均逸勤胥共既委身而許
國敢避事而貪生况臣親逢難際之時道在可行之
地豈不欲久安祿位益勉事功而力不逮心事將違

願嬰纏多病困阨百罹舊痛未平新瘍復潰形骸若
是溝壑可虞豈可猶居三吏事之崇徒竊千鍾之廩廟
堂之上乃處病夫軒冕之榮仍加槁質實恐累國誠
非愛身伏望 皇帝陛下洪造曲成至明委照

俾全進退之宜特示始終之賜上還
相印退即里居則臣永荷更生之恩敢忘九殞之報

三

臣以久嬰沈疾累貢危誠
睿旨尚闕俞音義不遑安言非獲已臣竊以上宰之
任大君是毗師長百僚儀刑列近巨川舟楫將濟艱

危大廈棟梁豈容撓弱當靖共於夙夜以帥正於朝
廷而臣受命以來年居病告造朝之際每損國容復
歸卧家又已踰月革膚益削喘息僅存倘勉强以能
支必疲羸之愈甚內則萬目所視外則四夷所聞豈
可尚脩冢司猶尸重祿邇者合宮歲事百執駿奔既
免侍祠又違宿衛端居公館阻受釐宣室之朝近望
闕庭有卧病周南之滯今明裡已事率土蒙禧是愚
臣可去之秋况拙疾無瘳之日敢祈避位庶免曠官
伏望 皇帝陛下深諒至誠曲加大惠察臣力小而
任重閔臣福過而災生使之弛負擔於秉鈞專精神

於救藥退安散地以盡餘齡瀝懇叩閣期於得請

賀 太皇太后受冊表

報功 文母奉冊東朝書軌所臻人祇交慶伏惟
太皇太后陛下天臨萬國坤載群生濟皇業之艱難
佑聖圖於久大號令之動淵默而雷聲德澤之流雲
行而雨施幽遐鼓舞跂喙涵濡惟時盛典之行曷稱
難名之烈至乃預抑徽稱之請退避外朝之居躬大
禹之勞謙體文王之寅畏爰諏穀旦率籲歡心百辟
造庭九奏脩樂載揚丕冊祇上鴻名同傾就日之瞻
共祝後天之祉騰頌聲於四表翔休氣於九清

賀 皇太后受冊表

涓選休辰誕揚鴻冊書文所暨岳抃攸同伏惟 皇
太后殿下儷極 先朝母儀萬國禕衣綸翟奉宗廟
之烝嘗卷耳葛覃首周南之風化布宣陰教保定皇
家莫隆帝母之尊爰脩天秩之禮群后在位六樂充
庭祇率歡心奉將容典體坤元而同久與聖祚以無
疆臣近望宸闈親逢華旦

賀 皇帝表

秉圭正宇發冊明庭三殿講儀萬方知孝伏惟 皇
帝陛下穆清居位濬哲在躬聖敬日躋聰明天憲露

門親學惟先五典之從溫室問安豈止三牲之養奉
東朝之慈訓揚 文母之徽音德教始於愛親神明

察其事地容臺秩禮筮史涓辰弁冕在庭笙鏞脩樂
金螭玉橋發揮帝典之文揄狄禕衣炳煥軒宮之耀
詠大明於周雅稽貴母於魯經凡在群生率同大慶

賀 皇太后牋

展儀中禁發冊外朝盛典惟行群生共慶伏惟 皇
太妃塞淵東德柔順承天輔佐 先朝勤勞內治附
寶啓軒皇之運姜姬興周室之基誕育 聖明纂承
謨烈爰膺萬乘之養實冠四妃之尊涓選休辰奉揚

顯冊堯門協慶軒耀增輝

賀太陽不虧表

伏覩今月一日太陽當食不食者此日而食方克謹於明威先天不違遂仰銷於變青伏惟皇帝陛下虔恭正事赫奕凝圖茂馨德以感神建大中而順帝當正陽之告朔有太史之奏占減膳法宮霈恩海寓誠心所格精稷自通是以靈雨夕流清風旦發三辰澄渙萬物昭蘇光明不虧夷夏咸覩昔者高宗祗畏享國百年宋景憂勤退星三舍穿高鑿德今古同符臣親覩殊祥限守留鑰莫由慶覲徒切歡呼

謝賜六典表

伏蒙聖慈特賜臣六典一部者上聖有作百度惟新稽古建官任人立政將憲章於周典爰考正於唐文眷惟當世之宜必視後王之法頒於列位延及守藩俾私室之受藏仰慈宸之訓迪披觀敢急紬繹知榮

慰坼殿攢表

元豐三年二月

伏審今月三日大行太皇太后坼殿攢者大事請期西階啓殯慈顏寢遠真馭不留恭惟皇帝陛下號慕難居孝思罔極凡在臣庶同切憂惶伏望少抑

睿懷俯遵經制上嚴宗廟下庇生民臣夙奉春宮遠
司留鑰阻趨慰列倍切常情

慰發引表

伏審今月二十日 大行太皇太后靈駕發引者鳳
翊啓行龍輜肅駕適臨祖載尤切攀號恭惟 皇帝
陛下孝性自天哀情過禮痛真游之不返瞻內寢以
如存中外之心追慕同切臣阻陪班慰但極涕零

留司慰發引表

伏承今月二十日 大行太皇太后靈駕奄及發引
恭惟 皇帝陛下攀號推咽聖情難居臣等伏限官

守不獲奔赴闕庭無任殞越之至

又留司慰

皇太后表

伏審今月二十日 大行太皇太后靈駕奄及發引
恭惟 皇太后殿下攀慕摧咽聖情難居臣等伏限
官守不獲奔詣宮庭無任殞越之至

靈駕至西京慰

皇后牋

伏覩今月日 大行太皇太后靈駕已至西京境內
者恭惟 皇后殿下遠違鳳闕祇護龍輜俯臨洛宅
之郊即次橋山之邑追攀罔極哀慕難任臣居守封
畿奔迎道路無任悲殞之至

又留司慰牋

伏覩今日日 大行太皇太后靈駕已至西京境內
者恭惟 皇后殿下躬御雲輶遠護仙躅將奉安於
昭寢爰俯次於洛郊哀慕惟深孝誠罔極臣等恪居
官守迎奉道涂無任悲殞之至

靈駕到陵慰 皇后牋

伏覩今日日 大行太皇太后靈駕已至 永昭陵
下宮伏惟 皇后殿下配位宸極嚴事宗祧祇率六
宮遠護仙駕奉安南邇哀慕難居臣以職事奔赴山
陵無任悲殞之至

又留司慰牋

伏覩今日日 大行太皇太后靈駕已至 永昭陵
下宮伏惟 皇后殿下遠違椒掖嚴奉梓宮上體聖
懷倍深哀慕臣等各以職事祇赴山陵無任悲殞之
至

進 皇后禮物狀

具銜臣某某物右謹隨狀上進冒瀆尊嚴臣無任惶
惧激切之至謹進

謝 皇后回賜狀

具銜臣某右臣伏蒙 皇后殿下特遣中使賜臣某

物若干臣無任感荷激切之至謹具狀奏謝以聞謹奏

慰掩皇堂表

伏觀今月十日永昭陵奉安慈聖光獻太皇太后梓宮禮畢者橋山既祔永追先帝之游蒼野不還深結溥天之痛伏惟皇帝陛下深居恭默西頤哀號想真馭以如疑慨慈闈之杳隔臣駿奔陵寢祇奉典司慰覲無由憂惶徒切

又留司慰表

伏觀今月十日永昭陵奉安慈聖光獻太皇太

后梓宮禮畢恭惟皇帝陛下攀慕摧咽聖情難居臣等伏限官守不獲奔赴闕庭無任殞越之至留司慰皇太后表

伏觀今月十日永昭陵奉安慈聖光獻太皇太

后梓宮禮畢恭惟皇太后殿下攀慕摧咽聖情難

居臣等伏限官守不獲奔赴宮庭無任殞越之至

伏觀今月十日永昭陵奉安慈聖光獻太皇太

后梓宮禮畢伏惟皇太后殿下奉先盡禮送往增哀

大事甫終孝誠倍至臣以職事祇從行宮無任殞越

之至甫獲奉慰於心... 伏觀今日十日... 永昭陵奉安... 慈聖光獻太皇太后... 后梓宮禮畢伏惟... 皇后殿下哀深送往號慕難居... 臣等各以職事陪從行宮無任悲殞之至... 伏審今日十九日... 慈聖光獻太皇太后神主... 禮畢者金輅徐還玉衣長掩從... 昭陵之劍履合清... 廟之樽彝恭惟... 皇帝陛下聖感難居孝思罔極音... 容未遠虛朝夕之間安饗祀有嚴惟春秋之匪懈伏... 願順禮之變節哀以時調護清躬導迎協氣仰副神... 祇之望俯安億兆之心臣居守都畿馳情軒闥阻伸... 慰覲徒切憂思

又留司慰表

伏審今日十九日嚴奉... 慈聖光獻太皇太后神主... 升祔清廟禮畢恭惟... 皇帝陛下攀慕摧咽聖情難... 居臣某等伏限官守不獲奔赴闕庭無任殞越之至... 慰... 皇太后表... 伏審今日十九日嚴奉... 慈聖光獻太皇太后神主... 升祔清廟禮畢恭惟... 皇太后殿下攀慕摧咽聖情

難居臣等伏限官守不獲奔詣宮庭無任殞越之至

同天節功德疏右語

右伏以朱火司辰薰風育初月紀正陽之德天開甲
觀之祥罄海宇以傾心望帝宸而獻祝恭集祇園之
侶並翻貝葉之文憑覺力之雄深荐福田之廣大伏
冀乾坤長久等睿筭以無疆日月照臨與皇明而不
息永居天寶丕冒群生

留司賀同天節表

伏以炎帝執衡時司大夏斗樞繞電天發殊祥當元
聖之挺生叶千齡之盛際鴻明繼照景祚無疆罄率

土以傾心效華封而獻祝恭惟皇帝陛下誠明天
縱濬哲日躋丕承五聖之基翕受三靈之貺惟正
陽之紀月乃甲觀之誕宸玉帛會朝梯航納貢臣等
謬塵通籍分守留都就日望雲阻預在庭之列後天
緼月徒傾祝壽之誠

同天節功德疏右語

伏以帝出膺期虹流紀節茂對當千之運於昭時萬
之祥敢率懽悰仰依覺蔭誦金言之秘密瞻玉相之
妙嚴總集勝因虔申久禱伏冀壽山高聳長居當極
之尊慧日增光永庇含生之品叢欣萃祝倍萬常倫

留司百官謝賜冬衣表

伏蒙 聖慈各賜冬衣者清風戒候方秋律之正中
賁帛表恩俾冬裘之預備頽惟虛受實切覲顏恭惟
皇帝陛下深覆萬方寵綏黎姓垂裳而聽海內之治
求衣而念天下之寒申勅有司時頒列位出大盈之
委積均麗澤以霑流豈曰無衣詎有秦人之賦何以
卒歲皆同函國之歌惟誓捐軀以圖報效

留司賀明堂禮畢表

伏審公月二十二日明堂禮畢者展采合宮荐德馨
於上帝因嚴 聖考廣孝治於多方大事熙成鴻恩

普被書文所混岳抃欣同恭惟

皇帝陛下則效乾

坤憲章古昔神化覃於無外至治格於太寧規恢

五聖之基誕受三靈之貺若祗舊典亟藏_藏上儀涓吉

季秋戒期百執告虔清廟肆饗總章籩豆苾芳荐四

時之和氣玉帛奔走同萬國之歡心坐宣室以延釐

御闡而霈澤騰頌聲於海寓塞休氣於穹旻凡在萌

生率均茂遂臣等獲班寬詔幸覲昌辰屬拘掌籥之

嚴阻預稱觴之末

大正三年六月二十

蕭明府辭謝之末

主率尚其進自昔弊在廣臨幸臨臨見海國幸

幅隕而盡氣辭似養故其高基在廣海是凡其臨

博之味廣王帛存矣同萬國之藩心坐言坐以與

幸林亦附其古其其其其其其其其其其其其其

正其之其其其其其其其其其其其其其其其其其

此其其其其其其其其其其其其其其其其其其其

其其其其其其其其其其其其其其其其其其其其

